

PAULO ME LETA ROOMA ÄTRUNGA BINAME BIME BAU ME

1 ¹ Cane Paulo, Yeesu Keriso me kaakesea bägrä gäne. Acejiyame cebine najuji teeme ätyepäneji biname me äbitame piyepu mara me nawenuji teeme Miiji Mene biname bine jajanename.

² Peei Miiji Mene tabe teeme sasa mename biname bine ituge jajanena teepi Oogäräneji Mene cabu oogärame egä cirege äbita. ³ Peei Miiji Mene lui Acejiyame me Bägrä mime Yageyame Yeesu Keriso poto cidi me. Tabe lui ai gawecewe cabu je biname me äbituji, Daawida me ingle cabu liba aplimlujü, ⁴ tabe cuta Acejiyame bau ca gyene. Tabe budre cabu ca liba arpinantuji, pui kokre ca biname bine jewabemuji egä tabe Acejiyame me conocäco Bägrä gyene. ⁵ Cane teeme miiji ne jepänujine, tabe liba cebine teeme ätyepäneji biname me nawenuji naace täápume cane iyeta maramara gawe biname bine gaabe awabejame teepi Yeesu Keriso me ngii poto cidi me mene äteciyame teebine ätrungame. ⁶ Weene cuta poto peei biname gemi, lui bine Acejiyame te itu tisoglicipi Yeesu Keriso me biname me äbitame.

⁷ Yoo, cäme mene agesa iyeta weeme täápume lui cina babo cewe Rooma je ätrunga cama inajininige, ingle Acejiyame baborage singi weeme täápume, weebibine ituge asogleca teeme biname me äbitame.

Acejiyame mime Babe piyepu mime Yageyame Yeesu Keriso, cane teebibine aawejanenine teemi miiji te lenajame weeme cabu piyepu poode weebibine ceerame.

Paulo Eso Mene Jiicige

⁸ Yoo, niinäce cane cäme Acejiyame ne eso ecärine Yeesu Keriso cabu ca iyeta weeme täápume, ingle naace gyene iyeta ai gawecewe cabu biname cina itecijenemige weeme ätrunga poto cidi me. ⁹ Cane Acejiyame me kaakesea iyeta cäme ngenecu cama jaawenemune, liba teeme Miiji Mene jaajanemune Yeesu Keriso poto cidi me. Teeme opo gaabe ai mene

jiicenine egä cane Acejiyame ne ewejanenine weeme täápume, ¹⁰iyeta padare cane liba teeme bau irecu lätumutune. Cane teebine ewejanenine egä cane gaabe päpäna ai padare cabu weeme bau otnime, tabe liba singi gyene. ¹¹Yoo, cane baborage singi gäne weebibine päpäname kokre ceerame weeme seemo ireclota täápume. ¹²Cane ai jijanininine, ingle cane singi gäne weeme ätrunga ne kokre me wawename cuta piyepu kokre päpäname weeme bau ca căme ätrunga täápume.

¹³Căme ätrunga binamewale, cane singi gäne weene umle äbitame egä bucurage padare cane ngene ituge atwanena weebibine ädărame, yepä cane äblicăco ge otni ngălu page. Cane singi gäne weebibine ätityera ceerame piyepu pei ätityera cabu ca weeme miiji ätrunga mule ne päpäname, cane lipu nuuja gawecewe biname bine pepu pana ätityera ituge ceera. ¹⁴Cane ngenecu ca asicnantine egä căme kaakesea gyene iyeta biname bine toraca gaabe awabame, iyeta lui cina Griik biname bime mene piyepu mule umle gemi, cuta lui cina teeme nuuja glunubora mene taatu jiicemusi; biname lui cina umleumle cama gemi, piyepu biname lui cina umle căco gemi. ¹⁵Yoo, cane peei name pi singi gäne Miiji Mene cuta weebibine jajanenime, weene lui cina babo cewe Rooma je inajininige.

Miiji Mene Lui Kokre Gyene

¹⁶Cane ngene jotwananine egä Miiji Mene lui babo kokre cama gyene, ingle Acejiyame bau ca gyene peei mene. Peei cabu kokre pisi nyene biname bine ngenecu atatröngărime teeme niija mule cabu ca äsecrera gaabe ceerame, iyeta lui cina peei Miiji Mene jäätrungusi. Peei mene niinăce Israela biname bime bau jajeji ge, puma cita ca cuta nuuja gawe biname bime bau me. ¹⁷Yoo, peei Miiji Mene te jiicenige Acejiyame lipu pui biname bine conocăco me jaawenemuge lui cina teebine jäätrungusi. Biname te toraca ireclota cabu me labacituge, teeme ätrunga liba Yeesu Keriso me kaakesea cabu gyene, piyepu tabe peei ireclota cabu cāngena yaanajuge teeme ätrunga name pi, Oogărăneji Mene te lipu jiicenige egä, “Pui biname me ireclota iyeteta gyene,

Acejiyame lui ne conocăco me jaawenuge teeme ätrunga cabu ca.

Iyeta Biname Conocono Gemi

¹⁸Acejiyame te biname bine umle jaawenanemuge egä tabe teebibine măpu daremu yăăcărānemuge teeme niijaniija ngene atwanena täápume piyepu teeme niijaniya waweneca täápume, ingle teeme niijaniya mule cina Acejiyame poto cidi me toraca ngene atwanena bine jibemusi.

¹⁹Acejiyame teebibine măpu daremu yăăcărānemuge, ingle naace popi biname bime täápume pajecu gyene teepi Acejiyame poto cidi me ngena umle cire läbitejisi, ingle tabe peei ne teeme täápume pajecu me ituge

wawena. ²⁰Yoo, pui padare cabu ca Acejiyame liba gawecewe ne tewenuji ngälu page, biname cina miiji gemi umle äbita egä Acejiyame pisi nyene piyepu teeme kokre iyeteta gyene. Ngänu gyene biname cina puu äblicäco teebine päpäna, yepä teepi miiji gemi iyeta gwidape päpäname Acejiyame lui bine ituge wawena, piba pui cabu ca teeme mule poto cidi me umle äbitame. Peei name pi teeme nuuja ingle lica gyene teeme umle cäco piyepu niiyaniya mule täöpume. ²¹Biname umle gemi egä Acejiyame pisi nyene, yepä teepi lica teebine yaawejanusi egä, “Maane peese näte cime caburage Acejiyame, cime ire atwiyame,” piyepu lica teebine eso yäacärsi iyeta gwidape täöpume. Peei name pi teeme ngene atwanena mage käkäco me ituge äbita, teeme mope cabu nuuja miiji ngene atwana lica gyene, yepä iyeta teeme ngene atwanena krokeciye gemi. ²²Teepi jicenis, “Cine umle cama gemi,” yepä teepi buduma gemi. ²³Yoo, teepi lica Acejiyame ne yaawejanusi, lui iyeteta gyene, yepä teepi biname pana cege bine jaawenemusi pui bine awejename, lui bime ireclota lica iyeteta gyene. Nuuja cina cege bine jaawenemusi lui gawe cabu otnetneja gwidape pana, piyepu ele, piyepu biicwale pana, peei bine awejename.

²⁴Peei buduma mule name pi Acejiyame biname bine papa ire taatu jaacitemuge teepi teeme conocono singisingi mule wawenecame. Teepi ajiri cama mule bine teemeteme jaawenemusi. ²⁵Teepi toraca ngene atwana ne Acejiyame poto cidi me yääyebtingtusi, piba tuwängle walya ngene atwana ne yaacatusi. Teepi yaawejanemusi piyepu teeme täöpume yiwäräjemusi lui gwidape bine Acejiyame te itu tewenemuji, lica Acejiyamerage ne yaawejanusi. Yepä, mine miiji Acejiyame ne awepyeräjame iyeteta. Yoo, mine pepu pa jaawenepesi!

²⁶Biname bime buduma awejena mule name pi Acejiyame teebibine ire taatu jaacitemuge teeme niyarage ajiri cama mule wawenecame. Pepu pi magebi cina singisingi läbitininusi nuuja magebi me tääpe täöpume. Peei lui babo niyarage gyene, lica magebi bime toraca mule. ²⁷Cuta rooriye cina pepu pana niyarage mule bine jaawenemusi. Teepi lica coga täöpume singi, yepä singisingi läbitininusi nuuja rooriye me tääpe täöpume. Teepi teeme tääpe me niyarage singi bine jaawenemusi, pepu pi mäpurage daremu ne jääpänusi teeme tääpe piyepu teeme ngene atwanena liba pui mule cina sabe jaawenemusi. Peei lui conocäco daremu gyene.

²⁸Ingle naace popi biname cina singi lica gemi ngene atwanename Acejiyame poto cidi me, tabe peei name pi teebibine ire taatu jaacitemuge, piba teeme Acejiyame cäco ngene atwanena cina iyeta niyarage me läbitininusi niya singisingi bine wawename, teepi lui bine cire lica jaawenemejisi. ²⁹Teeme niiyaniya mule cina babo läbitininusi, teepi nuuja singi lica conocäco mule täöpume, iyeta teeme ngene

atwanena nuuja biname poto cidi me lui claabe taatu. Teepi ire patre yaaglemusi, biname bine walya yaangletnäjemusi, larnginininusi, piyepu nuuja biname bine budre me yaaglecimusi. Teepi nuuja biname bine teeme ngenecu bora jäämugetnemusi. Teepi nuuja bine yäärmärimusi, ³⁰cuta teeme poto cidi me niia mene jicetnäjemusi. Teepi Acejiyame ne jäämugetnusi, piyepu teemeteme jääcelusi. Teepi lasicnantinusi egä teepi baborage gemi nuuja biname bine cabu ca, piba teemämu lawepyeräjininusi. Teepi ngene jwaatwananinusi cerämu cuta poto niia mule bine wawenecame; teepi cuta mage babe bime singi bine lica yaawademusi. ³¹Teepi geäji gemi niia mule wawenecame, peei name pi lica ngene ca agli egä, “Ai lui niia mule gyene.” Teepi lica teeme mene toraca me jaawenemusi, teepi lica asicnenta owecu nuuja biname bine täápume, piyepu nuuja singi lica gemi teeme binamewale täápume. ³²Teepi iyeta umle gemi Acejiyame me cotre pisi nyene peei mule täápume egä laati te peei mule bine jaawenemuge, tabe miiji budre päpäna, yepä teepi peei bine jaawenanemusi. Teepi cuta singi gemi nuuja cina peei bine wawenecame.

Acejiyame te Iyeta Biname bine Cirege Atrana

2 ¹Gone weene ngene jwaatwananinuye egä, “Yoo, poto biname pepu niyarage gemi,” ingle weene lica conocäco gemi, ngänu gyene weene laati bemi. Weene liba nuuja biname ne aitneja egä, “Niiyarage mule biname gyene,” piba teeme pana mule pa jewenepeye, weene weemämu laitnäjinye. ²Mine iyeta umle gemi egä Acejiyame conocäco gyene biname bine atraname lui cina peei niyarage mule jaawenemusi. ³Yepä, weene lui nuuja biname bine jaaitnäjemuye, cuta peei yepä niia mule jaawenemuye, weene gone ngene jwaatwaninuye egä Acejiyame te nuuja biname bine mäpu daremu pa yääcäremepi, yepä weene pagege äsecrera teeme atrana cabu ca. Eewe, weene licarage cirege äsecrera! ⁴Gone ngene jwaatwananinuye egä Acejiyame me owecu lui papa gwidape gyene, ingle tabe owecu baborage gyene piyepu lica watawata mäpu daremu weebibine ceera. Weene miiji umle gemi egä Acejiyame weeme bau babo owecu gyene, ai name pi tabe singi weene niia mule cabu ca atatrongärame teeme bau me. ⁵Yepä, weene liba ätecija cäco gemi, piba babo mäpurage cirege weeme daremu pui Ceräcerägäabu Bimu cabu, Acejiyame te liba biname bine conocäco cire jaatranemepi mäpu daremu ceerame. ⁶Yoo, Acejiyame piba iyeta biname bine teeme daremu cirege ceera teeme mule ibibi. ⁷Tabe iyeteta ireclota teebibine cirege ceera lui cina miiji mule jaawenemusi gloose cäco, ingle teepi lui singi gemi teeme jamyacu apaclyera, awepyeräja, piyepu ngälu cäco ireclota päpäname. ⁸Yepä, nuuja biname cina teeme singisingi bine taatu jaawenemusi; teepi toraca gaabe ne jäägyusi teeme conocono gaabe cabu

otnime, siige Acejiyame teebibine teeme mäpurage daremu cirege ceera. ⁹Teepi babo ngenecu mäpu piyepu cewe cire loocaninipesi. Iyeta lui cina niya mule bine jaawenemusi, teepi teeme mäpu daremu cirege päpäna, Israela biname niinäce piyepu nuuja gawe biname iyeta. ¹⁰Yepä, iyeta lui cina miiji mule bine jaawenemusi, Israela biname niinäce piyepu nuuja gawe biname iyeta, Acejiyame te jamyacu apaclyera, awepyeräja, piyepu poode teebibine cirege ceera. ¹¹Ingle naace popi iyeta biname lui yepä pana gemi Acejiyame me opo gaabe je.

¹²⁻¹⁵Yoo, iyeta lui cina Acejiyame me singi jaatropangtusi, teepi mäpu daremu cirege päpäna. Acejiyame te mäpu daremu cirege ceera maramara gawe biname bine, teepi liba teeme singi ne jaatropangtusi niya mule wawename. Ngänu gyene teeme bau oogäräneji lica ge Acejiyame me Cotre Mene Moose lui bine soogäremuji, ingle naace gyene teeme ngenecu bora teepi umle gemi lui mule conocono gyene, lui mule conocäco. Teeme ireclota cabu ca mine opo yaawatnusi egä Acejiyame me cotre piti nemi teeme trupa ngalebora. Teepi cuta ngena ca laglinusi egä miiji mule, coo niya mule, ingle nuuja taje teepi ngenecu miiji birige teeme mule poto cidi me, cuta nuuja taje ngenecu niya birige. Acejiyame cuta Israela biname bine teeme mäpu daremu cirege ceera teeme niya mule täapume, ingle naace gyene teeme bau piti nemi oogäräneji Cotre Mene, yepä teepi peei bine lica jaawenemusi. Teepi umle gemi lui gaabe toraca gyene, yepä teepi lica conocäco peei gaabe cabu otni. Yoo, biname te lica conocäco läbituge Acejiyame me opo gaabe, tabe liba umle taatu ngena ne wawename, yepä tabe cuta miiji peei ne toraca wawena. ¹⁶Yoo, pui bimu cirege otni, lui cabu Acejiyame te Yeesu Keriso ne cire jaajepi biname bime ogä ngena atwanena bine atraname, cane lipu Miiji Mene cabu jiićenine.

Cotre Mule Lica Gyene Äsecrera Gaabe Israela Biname bime täapume

¹⁷Yoo, weene lui cina jiiçuye egä, “Cine Israela biname gemi,” weene apu jingeninige egä weeme ätityera pisi nyene Cotre Mene cabu, piyepu weeme mene nesae lica gemi egä, “Acejiyame lui cime yene.”

¹⁸Weene iyeta umle gemi Acejiyame te ngena singi weene wawename, piyepu weene Cotre Mene cabu ca umle ituge äbita toraca gaabe luci yene. ¹⁹Weene biname bine jäje jaajananemuye egä, “Cine age temi awecluja irecu mäasumasu biname täapume,” piyepu egä, “Cine apaclyera gemi biname täapume lui cina krokeciye cabu icrajenige.”

²⁰“Cine age temi ablaweja biname buduma mule biname bime täapume piyepu abiberäja biname bägrä pana biname bime täapume.” Weene apu jingeninige, “Cine iyeta gwidape umle gemi, ingle Cotre Mene cime bau piti nemi, piyepu peei Cotre Mene toraca gyene.” ²¹Yoo, weene babo singi nuuja biname bine abiberäjame, ngena name pi weene

weemämu lica abiberäja? Weene bääirmi mene birige jajanena egä, “Ero gone!” Yepä, weene ero mule umle gemi. ²²Weene jiiceniye egä, “Sargi mule gone!” Yepä, weene cuta umle gemi peei mule. Weene uuje bine jäägyemuye, lica peei bine yiwäräjemuye, yepä weene gwidape bine ero ca yaawademuye peei uuje bime iiwäreja mete maramara cabu ca. ²³Weene jäje jaajananye egä, “Cime bau piti nemi Acejiyame me Mene,” yepä weene Acejiyame me miiji ngii sabe jaawenuye, weene liba teeme cotre bine jaatropangtemuye. ²⁴Oogäräneji Cotre Mene te jiicenige egä, “Weene Israela biname bime mule name pi nuuja gawe biname cina niiya mene jiicemusi Acejiyame poto cidi me.”

²⁵Yoo, weene Acejiyame me Cotre Mene liba cängena jaawenemuye, piba cuta miijirage birige teeme cewecu weeme tääpe cabu lenajame, yepä weene teeme Cotre Mene liba cängena lica birige wawena, piba weeme Acejiyame tääpume cewecu lui papa gyene weeme tääpe cabu. ²⁶Nuuja gawe biname, lui bime cewecu lica birige, teepi peei Cotre Mene liba jaawenemusi, Acejiyame teebibine pa yaawademepi, epu pana teepi cewecu cama gemi liyepu. ²⁷Yoo, weene Israela biname lui cina Cotre Mene jaatropangtuye, ngänu gyene peei mene weeme bau piti nemi oogäräneji, piyepu ngänu gyene weene cewecu cama gemi, weene weeme mäpu daremu cuta cirege päpäna, ingle naace popi poto nuuja gawe maramara biname cina Cotre bine toraca jaawenemusi, ngänu gyene Acejiyame me cewecu teeme tääpe cabu lica gyene. ²⁸Yoo, tääpe iirputa taatu te lica biname ne Israela biname me jaawenuge, ingle cewecu lui biname me tääpe papa cabu. ²⁹Yepä, tabe Acejiyame me toraca Israela biname gyene lui te teeme trupa piyepu teeme ngenecu Acejiyame bau me ituge ceera. Siige, peei lui Aceji Seemo me kaakesea cabu ca gyene, lica Oogäräneji Cotre Mene cabu ca. Pepu biname te lica nuuja biname bau ca awepyeräja yaacatuge yepä teeme awepyeräja lui Acejiyame bau ca gyene.

Acejiyame lui Toraca piyepu Conocäco Gyene

3 ¹Weeme nuuja biname te pama ngene jotwananenige egä, “Nää, Israela biname niinäce gaabe gemi nuuja gawe biname bime cabu ca?” coo egä, “Teeme tääpume, nää, lipu ätityera gyene teeme tääpe cabu cewecu?” ²Yoo, teeme tääpume miijirage birige. Pui lui babo gwidape gyene egä Acejiyame teeme mene Israela biname bine ecäremuji ire atwime iyeta nuuja biname bime tääpume. ³Yoo, toraca gyene egä poto Israela biname cina peei mene cängena lica ire jaawenemusi. Yepä, weene gone ngene jwaatwa-naninuye egä Acejiyame teeme mene cängena lica jaawenemuge ai ingle naace popi poto biname cina cängena lica peei mene bine jaawenemusi. ⁴Eewe, pepu lica! Acejiyame lui toraca gyene. Ngänu gyene iyeta biname cina walya mene jaajanemusi, Acejiyame

iyeta padare teeme mene toraca me jaawenemuge. Oogäräneji Mene teeme poto cidi me jicenige egä,

“Maane lui mene jicemute, peei mene cina meebine naawabusi egä conocäco gäte.

Maane cuta conocäco yuutrutute atrana cabu ca.”

⁵Yoo, page weeme nuuja te pama ngene jotwananenige egä, “Nää, cine Israela biname cina liba conocono mule jaawenemusi, biname piba taatu jääpänusi egä, ‘Acejiyame me mule lui mara gyene; tabe conocäco gyene!’ Ai name pi Acejiyame te miiji ngii puma cita ca jääpänuge cime niiya mule cabu ca, tabe peei name pi conocono gyene cibibine mäpu daremu peei täapume ceerame.” Pepu binamerage ngene atwanena gone! ⁶Peei lui walya gyene! Acejiyame äblicäco poto conocono mule äsuceja, ingle naace popi tabe toraca conocäco gyene. Tabe liba conocono gyene, tabe piba äblicäco ai gawecewe biname bine cängena atrana, yepä tabe miiji gyene biname bine atraname, ingle tabe conocäco gyene.

⁷Gonerage apu ngene jwaatwananinuye egä, “Nää, cine liba walya mule bine jaawenemusi, piba Acejiyame me mara toraca mule te babo me läbituge, siige tabe puma cita ca jamyacu apaclyera ne jääpänuge cime walya mule name pi. Acejiyame peei name pi miiji lica cibibine jaji egä, ‘Weene niiya mule biname gemi.’” Yepä, weene gonerage pepu ngene atwanena! ⁸Yoo, poto biname cina buduma ngene atwanena name pi jicemusi egä, “Mine niiya mule pa jaawenemepesi, ingle peei cabu ca Acejiyame me miiji ngii caburage pa läbitepi.” Yoo, poto biname cina cebine naitnäjusi walya mene ca egä cane te peei buduma mene jicine. Peei walya cabu ca teepi teeme mäpu daremu cirege päpäna. Eso!

Nuuja Biname te Lica Iyeta Padare Conocäco Mule Jaawenemuge

⁹Yoo, peei cabu ca mine umle gemi egä Acejiyame me opo gaabe mine lui Israela biname gemi, mine miiji lica gemi nuuja biname cabu ca. Cane weebibine ituge jaji egä iyeta Israela biname piiyepu iyeta nuuja gawe biname yepä pana gemi. Mine iyeta niiya mule me kokre cabu ninajininige. ¹⁰Oogäräneji Mene te pepu jicenige egä:

“Nuuja biname te conocäco lica gyene Acejiyame me opo gaabe je.

¹¹ Nuuja biname te lica toraca umle cama gyene.

Nuuja biname te lica toraca singi läbituge Acejiyame gome lenajame.

¹² Iyeta biname cina Acejiyame bau ca itu latatrongäripesi.

Teepi iyeta niiya me itu läbitipesi.

Nuuja biname lica gyene lui te toraca mule jaawenuge, lica yepä te wawena.

¹³ Babo walya mene te täduge teeme tage cabu ca, epu pana niiya

lengo te lipu tasatuge gape cabu ca, gape te liba ätrugera cäco.

Niiya mene te cobyame me niiya uudi pana täduge teeme tage cabu ca nuuja biname bine sabe wawename.

14 Teepei claaabe name pi alwi mene jiicemusi.

15 Teepei wata nuuja biname bine niiya jaawenemusi; budre me yaaglecemusi.

16 Ngänu gyene teepei cewe ne liba yaabmalusi, pita piyepu mäpu puma birige teeme niiya mule name pi.

17 Teepei umle cäco gemi poode cama lenaja.

18 Teepei cuta umle cäco gemi wälu pana äbita Acejiyame me opo gaabe je.”

19 Siige, mine umle gemi egä iyeta mene Cotre Mene cabu lui eei biname täापume lui cina Cotre Mene ngalebora yaacrajimuge. Pepu aitneja mene lui iyeta ai gawecewe biname bime täापume mine bojä agime mime niiya mule name pi, ingle mine iyeta cirege aclajuta Acejiyame me opo gaabe je atrana täापume. 20 Nuuja biname te licarage Acejiyame me opo gaabe je conocäco läbituge teeme Cotre Mene waweneca cabu ca, yepä Cotre Mene me kaakesea agesa: Biname bine umle wawename egä teepei niiya mule cuta jaawenemusi.

Acejiyame Lipu Biname bine Conocäco me Jaawenemuge

21 Yoo, Acejiyame gaabe ne ituge awabudnita egä biname cina lipu Acejiyame me opo gaabe je conocäco me läbitininusi, piyepu ai gaabe lica birige cotre wawena. Cotre Mene piyepu mename biname bime mene cina itu teitnäjujisi peei gaabe ne. 22 Biname cina Acejiyame cama conocäco läbitininusi, teepei liba Yeesu Keriso ne jäätrungusi. Peese nyene yepä taatu gaabe. Nuuja mara gaabe lica gyene Israela biname bime täापume piyepu nuuja gawe biname bime täापume, 23 ingle naace gyene iyeta biname cina niiya mule bine jaawenemusi. Iyeta biname lui toraca ingwe gaaberage gemi Acejiyame bau ca, tabe lui conocäco piyepu jamyacu apaclyera cama gyene. 24 Yepä, Acejiyame te biname bine papa itityeräjenemige teeme babo miiji cabu ca. Tabe teebibine teeme täापume kälyä jaawenemuge Yeesu Keriso me kaakesea name pi, lui kaakesea te biname bime mäpu daremu yääyeblinge-muge. 25 Acejiyame Yeesu ne jityepuji biname cabu me teeme tääpe piyepu uudi ca Acejiyame ne iiwärejame biname bine teeme niiyaniya mule cabu ca äsecrera. Yeesu Keriso me uudi tapiruji, tabe budre jepänuji, siige biname bime äsecrera gaabe pepu jewenuji. Yoo, biname cina ai äsecrera gaabe ne jääpänuusi, teepei liba Yeesu ne jäätrungusi. Acejiyame peei äsecrera gaabe ne jewenuji, pepu pi jewabemuji egä teeme mule uja niinäce padare cabu lui conocäco ge, tabe lui padare cabu biname bime niiya mule bine yäasuwäjemuge, 26 ingle tabe ingwe padare ne jewagrienuji Keriso liba tatyaramtepi biname bime mäpu daremu ne äyebtingtame. Tabe ai padare cabu teemämu awabudnitenige egä tabe conocäco gyene, ingle peei lui conocäco mule gyene tabe biname bine mäpu daremu cabu ca lipu conocäco me jaawenemuge, lui cina Yeesu ne jäätrungusi.

²⁷Yoo, nuuja miiji lica gyene biname teemämu awepyeräjame, ingle naace popi puu biname cina umle gemi awepyeräja waadename cotre waweneca täöpume, yepä teepi umle cäco awepyeräja waadename ätrunga täöpume. ²⁸Yoo, pajecu gyene egä biname te Acejiyame cama conocäco läbituge ätrunga cabu ca, lica cotre waweneca cabu ca. ²⁹⁻³⁰Acejiyame peese nyene yepä taatu Israela biname bime täöpume piyepu nuuja gawe biname bime täöpume. Tabe Israela biname bine conocäco me cire jaawenemepi teeme ätrunga name pi, cuta piyepu nuuja gawe biname bine conocäco me cire jaawenemepi teeme ätrunga name pi. ³¹Yoo, cane lica peei mene jiicenine mime Cotre Mene äyebtingtame, ingle naace gyene mine liba Yeesu ne jäätrungusi, mine piba taatu miiji gemi teeme cotre cängena wawename.

**Abrahamo me Ätrunga cabu ca Mine Umle Äbitininago
egä Ätrunga Lui Baborage Gwidape Gyene**

4 ¹Mine ngene jwaatwananinago Abrahamo poto cidi me, tabe lui mime Israela biname bime kaakesaare gyene. ²Abrahamo Acejiyame me opo gaabe liba conocäco me läbituge teeme kaakesea ca, piba teeme ingle pisi nyene teemämu awepyeräja, yepä pepu lica ge. Abrahamo äblicäco teeme kaakesea ne awepyeräja, ingle naace gyene ³Oogäräneji Mene te jiicenige egä, “Abrahamo Acejiyame ne jitrungige, siige teeme ätrunga name pi Acejiyame teebine einige conocäco ca.” ⁴Yoo, biname te liba rarekaake jääpänuge teeme kaakesea cabu ca, tabe lica teeme rarekaake poto cidi me ngene jwaatwananuge egä, “Agesa owecu gwidape cäme täöpume.” Eewe, tabe ngene jwaatwananuge egä, “Agesa cäme daremu cäme kaakesea täöpume.” ⁵Yepä, biname te liba Acejiyame ne jäätrunguge, Acejiyame piba peei cabu ca teebine conocäco me jaawenuge. Peei ätityera lui daremu lica gyene, ingle pui biname te lica teeme kaakesea cabu ca Acejiyame cama conocäco läbituge. Yoo, Acejiyame te conocono biname bine yaainemuge conocäco ca, eei biname lui cina teebine jäätrungusi. ⁶Ai mene lui cäme taatu lica gyene, yepä ujarage Daawida te mene jiiçuji pui biname me gege poto cidi me, Acejiyame lui ne conocäco me jaawenuge teeme waweneca kaake poto ca. ⁷Daawida mene bine yoogäremuji peei poto cidi me Salamo uupera peba cabu egä:

“Babo ngenecu gege gemi pui biname lui bime conocono Acejiyame te yiisibricmuge,

lui cina kälyä gemi teeme conocono mule cabu ca.

⁸Teepi babo ngenecu gege gemi,

ingle siige, Acejiyame te lica ingwe ca acnema teeme conocono bine.”

⁹Yoo, Daawida me mene poto cidi me mine ngene jwaatwa-naninago egä pui babo ngenecu gege laati bemi? Nää, pui biname täöpume taatu

peei mene, lui bime tääpe matikolä iirputäneji gemi Acejiyame me cewecu acatame? Eewe, lica teeme taatu me. Peei ngenecu gege cuta teeme tääpume lui cina jäätrungusi, yepä teeme tääpe cabu cewecu lica gyene, ingle mine umle gemi egä Acejiyame Abrahamo ne einige conocäco ca teeme ätrunga name pi. ¹⁰Tabe lui padare cabu peei ne jewenige, nää Abrahamo me tääpe iirputa kaakesea niinäce gaabe, coo ingwe gaabe ca? Yoo, Abrahamo liba camuge teeme tääpe iirputa, Acejiyame teebine einige egä, “Conocäco biname gyene.” ¹¹Abrahamo ingwe ca teeme tääpe matikolä ne jirputuji cewecu tääpume egä Acejiyame teebine ituge acata teeme ätrunga name pi. Yoo, peei name pi weene iyeta lui cina Acejiyame ne jäätrunguye piiyepu tabe lui bine conocäco me niwenininuge, Abrahamo lui weeme ätrunga kaakesaare gyene, ngänu gyene cewecu liba lica yaacatuwe. ¹²Cuta mime poto cidi me lui cewecu cama gemi, Abrahamo cuta mime kaakesaare gyene, ingle mine page Acejiyame ne jäätrungusi, Abrahamo lipu teebine itu jitrunguji, tabe liba camuge cewecu ne acata.

Abrahamo Acejiyame me Miiji ne Ecatuji Teeme Ätrunga cabu ca

¹³Ujarage Acejiyame liba Abrahamo ne jejuji egä, “Weene ai gawecewe ne cirege acata, maane piiyepu määme kaakesaare cama,” pui padare cabu Abrahamo nuuja umle lica ge Oogäräneji Cotre Mene poto cidi me, ingle pui cotre me padare camuge atyaramta. Yoo, Acejiyame Abrahamo ne peei mene jejuji lica teeme cotre wawena name pi, yepä naace name pi egä tabe Acejiyame ne jitrunguji, piba teeme bau ca mene itecijuji egä, “Maane cäme tääpume conocäco biname gäte.” ¹⁴Yepä biname te liba Acejiyame me miiji ne jääpänuge cotre wawena ca, piba nuuja ingle lica gyene ätrunga tääpume, cuta piba papa gyene Acejiyame lui mene ituge jaji. ¹⁵Yoo, mine liba cotre ne atropengta, mime mäpu daremu pisi nyene peei tääpume, yepä cotre liba lica ge, piba cuta lica gyene cotre atropengta.

¹⁶Yoo siige, Acejiyame ngena miiji ituge jaji ceerame, mine ätrunga ca jääpänusi, naace tääpume egä Acejiyame owecu name pi papa ceerame, piiyepu naace tääpume tabe iyeta Abrahamo me kaakesaare bine ceerame. Lica Israela biname taatu cina jääpänusi, lui cotre bine jaawenemusi, yepä cuta eei cina lui Abrahamo pana Acejiyame ne jäätrungusi. Abrahamo peese nyene lui ätrunga cabu mine iyeta bime babe, ¹⁷Acejiyame Abrahamo ne lipu jejuji Oogäräneji Mene cabu egä, “Cane meebine babe me naawenepene bucurage gawe maramara biname bime tääpume.” Yoo, Acejiyame me opo gaabe, Abrahamo lui epu pana babe liiyepu mime tääpume. Tabe Acejiyame ne jitrunguji lui me kokre pisi nyene budre biname arpinerame, piiyepu lui te mene ca gwidape bine jaawenemuge, lui cina lica ituge lenaja. ¹⁸Abrahamo teebine jewagrijuji

teeme mene bāgrā poto cidi me toraca me wawename, ngānu gyene tabe puu umle lica ge Acejiyame te peei ne lipu pagege wawena, tabe papa jewagrijuji. Siige, ingwe ca tabe kaakesaare ngii jepānuji maramara gawe biname bime bau ca, epu pana Acejiyame teebine lipu itu jejuji egā, “Māāme kaakesaare bucurage cirege ābita.” ¹⁹Mine Abrahamo me ātrunga poto cidi me ngene jwaatwananinago. Tabe yepā hanred kāmāge mameta joomluji, yepā teeme ātrunga te enajuji kokre cama. Tabe ngene jotwanuji egā, “Cane moda gāne; cane budre mameta gāne, cuta piiyepu cāme coga Saara tabe āblicāco bāgrā pāpāna,” ²⁰yepā tabe lica jejuji egā, “Acejiyame me mene āblicāco ābita.” Tabe teeme ātrunga cabu kokre ābituji, siige Acejiyame ne ewepyerājuji, ²¹jejuji egā, “Acejiyame me mene toraca me pa lābitepi. Cine bāgrā ne pagege pāpāna.” ²²Peei name pi Acejiyame liba teeme ātrunga ne jepānuji, tabe jejuji egā, “Maane cāme tāāpume conocāco biname gāte.” ²³Yoo, peei mene egā “Maane cāme tāāpume conocāco biname gāte,” lui lica oogārāneji ge Abrahamo tāāpume taatu, ²⁴yepā cuta mime tāāpume oogārāneji ge, Acejiyame lui bine cirege jaji egā, “Weene cāme tāāpume conocāco biname gemi,” mime tāāpume lui cina teebine jāātrungusi, lui te mime Yageyame Yeesu ne budre cabu ca erpinantuji. ²⁵Yoo, mime conocono mule name pi tabe budre ābituji, piiyepu budre cabu ca arpinanteji gyene naace tāāpume mine conocāco ābitame Acejiyame cama.

Acejiyame me Ātityera Mime tāāpume

5 ¹Ai ingle naace gyene mine ātrunga ca conocāco me ituge ābita Acejiyame me opo gaabe je, mime poode pisi nyene Acejiyame cama mime Yageyame Yeesu Keriso me kaakesea name pi. ²Tabe mime ātrunga ca mibibine niwadininige teeme babo miiji cabu lenajame. Mime babo ngenecu gege pisi nyene, ingle mine umle gemi egā mine Acejiyame me jamyacu apaalyera cabu cirege lenaja. ³Mine liba māpu jāāpānusi, mime ngenecu gege cuta pisi nyene, ingle naace popi mine umle gemi egā peei māpu te mibibine niwenininuge bojācu lenajame, ⁴piiyepeu peei bojācu lenaja te mime ngenecu bine kokre me jaawenemuge, piiyepu ngenecu kokre cama mine jaawagrijuji Acejiyame ne tabe mibibine āsecrerame. ⁵Peei awagrija lica papa me lābituge, ingle tabe Aceji Seemo ne ituge ātyepa mime yepāyepā trupa cabu lenajame mime ngenecu bine umle wawenename egā teeme baborage singi pisi nyene mime tāāpume.

⁶Yoo, mine liba āblicāco mimāmu ātityerāja, Acejiyame me miijirage padare cabu, Keriso te piba budre ābituji mibibine ātityerame, lui niya conocono biname gemi. ⁷Yoo, mime gawe biname bime mule cabu, nuuja biname te pama lica gyene budre ābita nuuja biname ne ātityerame, ngānu gyene tabe conocāco biname coo piiyepu miiji biname birige, yepā Acejiyame me mule mara gyene. ⁸Teeme singi epu baborage gyene

mime täápume egä pui padare mine liba conocono biname ge, tabe piba teeme Bägrä Yeesu ne tityepuji budre äbitame mibibine ätityerame. ⁹Yoo, Yeesu liba budre äbituji, teeme uudi te tapiruji mibibine Acejiyame me opo gaabe je conocäco wawenname, cuta piyepu teeme peei ätityera ca mine cirege äsecrera mäpu daremu cabu ca, Acejiyame lui biname bine cirege ceera teeme niia mule täápume. ¹⁰Mine niinäce Acejiyame cama cubuyame pana ninajenäjimi, yepä teeme Bägrä me budre cabu ca Acejiyame te mibibine teeme biname me itu niwenipi. Yoo, page mine teeme biname gemi, piyepu tabe mibibine niia mule cabu ca toraca cire nisechräpi teeme Bägrä me ireclota name pi. ¹¹Peei name pi mime baborage ngenecu gege pisi nyene Acejiyame täápume, lui te mime Yageyame Yeesu Keriso name pi mibibine teeme biname me itu niwenininuji.

**Adamu cabu ca Biname cina Budre ne Jepänujisi; Yepä,
Keriso cabu ca Teepi Ireclota ne Jepänenisi**

¹²Yepä biname Adamu te conocono mule ne jewenuji, piba budre äbituji teeme niia name pi. Pepu pi iyeta biname budre läbitininusi, ingle naace gyene teepi conocono mule cuta jaawenemusi. ¹³Acejiyame te Cotre Mene Moose ne liba camuge ceera, biname cina piba niia mule bine tewenemäjumesi. Yoo, peei biname cina Cotre Mene bine lica yaabiberäjemusi, ingle Cotre Mene camuge atyaramta, peei name pi Acejiyame teeme niia mule bine lica ecnemuji Atrana Bimu täápume. ¹⁴Biname Adamu cabu ca ngälu Moose me padare teepi niia mule bine jaawenemusi, piba peei cabu ca budre jääpänanusi, ngänu ge teeme peei niia mule lui cotre atropangta lica ge Adamu me liiyepu, tabe liba cude uli kuu ne erwuji.

Adamu me niia mule te lipu joomlemige iyeta biname bine, pepu pana Keriso miji pi miiji mule te totnenige iyeta biname bine ätityerame. ¹⁵Acejiyame me owecu mule mara gyene Adamu me conocono mule cabu ca. Toraca gyene egä bucurage biname cina budre läbitininusi pui yepä biname Adamu me conocono mule name pi, yepä bucurage biname cina conocono mule täápume kälyä läbitininusi pui nuuja biname Yeesu Keriso me ätityera name pi, ingle naace gyene Acejiyame babo owecu gyene biname bime täápume. ¹⁶Cuta piyepu Acejiyame me owecu piyepu ätityera mule baborage gyene Adamu me conocono mule cabu ca. Niinäce Adamu yepä conocono mule ne jewenuji, piba Acejiyame teebine jejuji egä, “Maane conocono biname gäte!” Yepä, ingwe ca bucurage biname liba conocono jaawenemusi, Acejiyame piba teebibine yäätityäremuge, jaajemuge egä, “Weeme conocono piti nemi, yepä weene kälyä gemi peei cabu ca Yeesu Keriso me miiji kaakesea name pi.” ¹⁷Cuta piyepu Acejiyame me ätityera mule kokre gyene Adamu me conocono mule

cabu ca. Toraca gyene egä pui yepä biname me conocono mule name pi budre me kokre te joomlemuge iyeta biname bine, yepä peei nuuja biname Yeesu Keriso teeme ätityera mule lui babo kokre gyene budre me kokre cabu ca. Iyeta biname lui cina Acejiyame me owecu gwidape ne yaacatusi, piyepu teeme baborage miiji cabu ca teeme täápume conocäco me läbitininusi, teepi ngälu cäco ireclota cabu yaacrajuge Yeesu Keriso me kokre cabu je.

¹⁸Yoo, Adamu me conocono cabu ca iyeta biname conocono jaawenemusi, piba teeme mäpu daremu yaawademusi, yepä Yeesu Keriso me conocäco ireclota cabu ca tabe äsécrera gaabe ne jewenuji iyeta biname bime täápume teepi ngälu cäco ireclota ne päpäname. ¹⁹Adamu me ätecija cäco mule cabu ca bucurage biname cina ätecija cäco läbitininusi, yepä Yeesu Keriso biname bine Acejiyame täápume conocäco cire jaawenemepi, ingle tabe Acejiyame me singi mene itecijuji, siige budre me äbituji biname bine ätityerame.

²⁰Moose te biname bine jejananemuji Acejiyame me Cotre Mene, naace täápume Cotre Mene te teebibine awabame teeme niiya mule lipu bucurage gemi. Siige, biname cina liba umle läbitininusi teeme niiya lipu baborage gyene, teepi piba cuta umle läbitininusi Acejiyame me miiji lipu baborage gyene biname bime täápume. ²¹Niinäce, biname bime niiya mule te teebibine yaawademuge teeme budre me, yepä page Acejiyame me miiji mule te biname bine yaawademuge teepi teeme opo gaabe je conocäco äbitame, piba ngälu cäco ireclota ne jääpänusi mime Yageyame Yeesu Keriso me kaakesea name pi.

Mine Yepä me Läbitinago Keriso cama Lenajame

6 ¹Nää, weene pama apu jingenininige egä, “Nuuja niiya lica gyene mine liba conocono mule wawename, ingle piba Acejiyame me miiji mule mime täápume cuta babo me läbituge.” ²Pepu ngene gone jwaatwananinuye. Mime täápume conocono mule te ituge apira, siige mine äblicäco conocono mule cabu cääri lenaja. ³Weene miiji umle gemi egä mine liba niiye ca äciseja ne ituge acata Yeesu Keriso me ngii cabu, mine epu pana egä ten cama yepä me itu äbitininujago. Yoo, mine epu pana gemi ten cama gigri budre ituge. ⁴Peei niiye ca äciseja cabu ca mine ten cama gigri budre, piyepu gape cabu gigri acranäneji gemi, siige mime Babe te Keriso ne budre cabu ca lipu erpi-nantuji teeme babo kokre ca, mine cuta pepu miiji gemi arpinera kirece ireclota cabu lenajame.

⁵Yoo, mine liba ten cama yepä me äbitini-nujago teeme budre cabu, mine cuta ten cama yepä budre cabu ca cirege arpinera. ⁶Mine umle gemi ngena ge ingle ai budre mene täápume. Mime sasa trupa agleji pana ge pui padare cabu teepi Yeesu ne baarge uli cabu liba etecwamtujisi. Pepu pi Acejiyame cuta miiji gyene agli mime trupa me kokre singi ne

niiyaniya mule täápume mine niiya mule me kokre cabu ca äsecrera. 7Ingle biname te liba budre pana birige, tabe piba asatäneji gyene niiya mule me kokre cabu ca. 8Yoo, mine liba Keriso cama ituge budre, mine jitrungenisi egä mine ten cama cuta ireclota me cire larpinärripago. 9Yoo, mine umle gemi egä Keriso itu arpinantuji budre cabu ca, siige tabe lica budre ingwe ca. Budre me kokre te äblicäco teebine cääri oomlana. 10Tabe yepä gääbu budre äbituji biname bime niiya mule täápume, yepä page tabe Acejiyame täápume ireclota cama enajenige. 11Yoo, weene pepu ngene jotwananineye egä, “Cine budre gemi conocono mule waweneca täápume, yepä Keriso Yeesu cama älengläcita miji pi cine ireclota gemi Acejiyame täápume.”

12Peei name pi gone weebibine niiya mule te iwadininuge, weeme conocono singi wawename. 13Cuta piyepu weeme tääpe gone ceera niiya kaakesea wawename, yepä weemämu äcärineye Acejiyame bau me. Weene epu pana biname gemi lui cina budre cabu ca ituge äsecrera ireclota cabu me, peei name pi weene weemämu äcärineye Acejiyame bau me teeme miiji kaakesea wawename. 14Weene lica Cotre Mule cabu inajininige, luma conocono mule te ibibi gyene weebibine oomlaname, yepä weene Acejiyame me miiji cabu page inajininige. Peei name pi gone niiya mule ne padare ceera.

Mine Miiji Conocäco Lenajame

15Weene gone apu jingenininuge egä, “Ngänu gyene mine liba cotre bine jaatropangtemusi, ingle mine lica cotre mule cabu ninajininige, yepä mine lui Acejiyame me miiji cabu temi.” Pepu ngene gone jwaatwananinuye, 16ingle weene umle gemi egä lui me kokre cabu weene singi lenajame, pui kokre te weebibine iwadininige. Peei name pi weene liba conocono mule me kokre cabu singi lenajame, pui te weebibine iwadininuge budre me, coo weene liba singi Acejiyame me kokre cabu lenajame teeme mene ätecijame, pui te weebibine iwadininuge conocäco me äbitame teeme opo gaabe je. 17-18Yoo, niinäce weene niiya mule me kokre cabu itu inajininuui, yepä page weene kokre ngenecu cama yaacatuwe pui toraca mene ne, weene lui ituge ätecija. Acejiyame weebibine niiya mule me kokre cabu ca itu isecrärinuui teeme singi cabu ibäcnininuui teeme toraca mule cabu lenajame. Peei name pi baborage eso Acejiyame täápume. 19Cane ai mene weeme ireclota cabu ca eboclomtenine weeme täápume pajecu wawename. Niinäce weene tääpe piyepu ngene atwanena niiya mule täápume itu icranemujiye. Weeme niiya mule piyepu jugi mule baborage äbitininuujisi. Siige, page weene weemämu äbitineye toraca mule täápume miiji piyepu conocäco mule taatu wawenecame.

20Niinäce weene liba itu inajininuui conocono mule cabu, weene piba Acejiyame me singi cabu lica inajininuui piyepu conocäco mule bine lica

jewenemujiye. ²¹Page weene ajiri gemi peei niiya mule poto cidi me. Nää, weene ngena miiji daremu ne ituge pöpána pui niináce mule cabu ca? Teeme daremu lui budre piiyepu niiya puupu cabu lenajame. ²²Yepä, page weene äsecräreji gemi niiya mule cabu ca. Weeme niiya singi bine weene lica jaawenemuye, yepä weene weemämu Acejiyame bau me ituge ceera teeme singi wawename. Page weeme daremu gyene conocäco mule wawenecame ngälu iyeteta ireclota weene cirege pöpána. ²³Yoo, niiya mule me daremu gyene budre piiyepu niiya puupu cabu lenajame iyeteta. Yepä, Acejiyame owecu gyene mime täápume piiyepu mibibine iyeteta ireclota ne nicärininige mime Yageyame Yeesu Keriso cama ngälu cäco lenajame.

Keriso me Biname bine Cotre Mule te Lica Joomlenemige

7 ¹Cäme ätrunga binamewale, weene ngene pa jiglipi ai mene, inge weene umle gemi cotre poto cidi me. Biname te liba cotre mule cabu yaanajuge, cotre te teebine yaacanuge ngälu tabe budre läbituge, cotre me kokre piba siige. ²Peei lui epu pana rooriye cama magebi te lipu cotre cabu waanajuge, tabe miiji teeme rooriye cama yepä lenajame teeme ireclota ngälu gaabe, yepä teeme rooriye liba budre, siige peei cotre teeme täápume. Tabe piba miiji gwene cuta nuuja rooriye ne acata. ³Yoo, tabe liba nuuja rooriye cama onajige, piiyepu teeme niináce rooriye te liba ireclota gyene, biname cina waainusi, “ero magebi” ca, yepä rooriye te liba budre, tabe asatäneji gwene pui cotre cabu ca. Tabe piba ero magebi lica gwene, liba nuuja rooriye ne yaacatuge. ⁴Yoo, cäme binamewale, cotre mule poto cidi me weene peei magebi pana gemi. Cotre mule lui weeme täápume epu pana pui magebi me niináce rooriye liiyepu. Yepä, weene Keriso me budre ituge acata cuta weeme täápume, siige weene epu pana gemi budre biname liiyepu cotre mule poto cidi me. Peei te lica gyene weebibine waadena. Keriso lipu budre cabu ca arpinantuji, weene pepu pana ituge arpinera kirece ireclota cabu me. Page tabe epu pana kirece rooriye liiyepu weeme täápume; weene teemi nemi. Weene miiji teeme kaakesea wawena Acejiyame täápume. ⁵Niináce mime ngene atwanena lui ai gawe me mule cabu. Mine liba umle äbitininujago cotre poto cidi me mene egä, “Gone apu pana mule wawena,” piba mime singi te babo me äbituji pui niiya mule täápume, siige mime tääpe me singisingi mine cuta jaawenemusi budre gaabe cabu abacitame. ⁶Yepä, page mine äsecräreji gemi cotre mule cabu ca. Mine epu pana budre biname liiyepu cotre mule poto cidi me. Cotre mule äblicäco mibibine cääri oomlana. Siige mime täápume pui sasa mule, pui Oogäräneji Cotre Mene te lica mibibine niwadininuge. Page kirece mule te mibibine niwadininige, peei lui Aceji Seemo me.

Miiji Ngene Atwanena piiyepu Niiya Ngene Atwanena Cubuyame pana Gegi Biname bime Trupa Ngalebora

⁷Peei mene name pi pama poto biname cina pa jicemepesi egä, “Cotre lui niiya gwidape gyene,” yepä peei lui toraca lica. Cotre liba lica, mine

piba umle lica lui mule gyene niiya, coo lui mule gyene miiji. Yoo, cotre mene pisi nyene egä, “Gone gwidape täápume singisingi läbitininuye.” Peei cotre cabu ca cane umle itu äbitujine pepu singi poto cidi me. ⁸Peei cotre mene name pi cäme niiya ngene atwanena piba tasatige, piba cäme baborage singi pisi nyene nuuja biname bime gwidape täápume. Cane liba umle lica peei cotre mene, piba cäme niiya ngene atwanena papa kaakesea cäco yaanajuge cäme ngenecu bora. ⁹Yoo, niinäce cane miiji asicnantujine, inge cane nuuja umle lica gäne cotre mene poto cidi me egä, “Gone peei niiya bine jaawenemute!” Yepä, cane liba umle äbitujine peei cotre mene poto cidi me, cane piba baborage singi äbitujine pui niiya mule wawename. ¹⁰Cuta piba taatu umle äbitujine egä cane budre gaabe cabu me ituge abacita, inge niiya mule me daremu lui budre gyene. Peei cotre Acejiyame lui ca singi cebine ätityerame ireclota gaabe cabu lenajame, peei ca cane umle äbitujine egä cane budre gaabe cabu säne. ¹¹Cane liba apu nangenige egä cotre mene wawena lui gaabe gyene iyeteta ireclota täápume, piba cäme niiya ngene atwanena te tasatenige piiyepu peei cotre ca cebine singisingi me nawenige. Piba peei te cebine nawabenige egä cane budre gaabe cabu abacitenine.

¹²Yoo siige, cotre mene lui Acejiyame bau ca gyene, peei name pi iyeta teeme maramara cotre lui epucäco, miiji, piiyepu conocäco gemi. ¹³Cotre te lica cebine budre gaabe cabu nacitenige, yepä cäme niiya ngene atwana te peei ne jewenenige. Cäme niiya ngene atwana te miiji cotre ne ecatenige, cebine peei ca nangletnäjenige, piba nawabenige egä cane budre gaabe cabu säne. Niiya mule lui pepu gyene. Yoo, cotre mene cabu ca mine opo yaawatnusi lipu toraca niiyarage gyene mime niiya ngene atwanena.

¹⁴Mine umle gemi egä Cotre Mene lui Acejiyame bau ca gyene, yepä cane binamerage gäne. Niiya mule te cäme ngenecu ne joomluge. ¹⁵Cäme mule poto cidi me cane toraca umle lica gäne: cane cäme toraca singi bine lica jaawenemune, yepä lui mule täápume cane singi lica gäne, peei bine jaawenemune. ¹⁶Yoo, cane liba jaawenune cane lui mule singi lica wawename, peei mule ca cane jewabenine cäme toraca asicnenta ne egä, “Cotre mene lui miiji gyene.” ¹⁷Siige, peei lui cäme toraca singi lica gyene egä cane niiya mule bine jaawenemune, yepä cäme niiya ngene atwana te tasatuge cäme ngenecu cabu ca, cane puma cita ca peei niiya bine jaawenemune. ¹⁸Cane umle gäne egä cäme trupa cabu nuuja miiji lica gyene. Cane cämämu äblicäco gäne cäme tääpe ne giri acita miiji mule wawename. Cane singi gäne, yepä äblicäco! ¹⁹Cäme singi pisi nyene miiji mule wawename, yepä cane lica peei bine jaawenemune. Cane singi lica gäne niiya mule wawename, yepä cane peei bine jaawenemune. ²⁰Cane liba peei bine jaawenemune lui täápume cane singi lica gäne, piba lica canerage te peei bine wawena, yepä pui niiya ngene atwanena cina peei bine jaawenemusi lui cina täsuge cäme ngenecu bora ca.

²¹Yoo, căme mule apu gyene: Cane liba singi miiji wawename, niia ngene atwanena te piba tasatuge, cebine nacanuge niia cabu me. ²²Pisi nyene căme ngenecu bora baborage singi Acejiyame me Cotre wawename, ²³yepă cane asicnantenine cuta mara kokre ngene atwanena piti nemi căme cabu. Peei cina căme miiji singi ne jăălăcnutusi, cebine kokre cama noomlusi căme tăăpe me niia singi mule wawename. ²⁴Cane peei name pi babo ngenecu măpu găne. Laati te ibibi gyene cebine asatame ai niia mule cabu ca, lui te cebine nacanuge căme budre me? ²⁵Peese nyene Yeesu Keriso! Tabe te äsecrera gaabe ne itu jewenuji. Baborage eso Acejiyame tăăpume, lui te Yeesu ne tityepuji mibibine ätityerame!

Yoo siige, mimerage kokre ca mine äblicăco Acejiyame me Cotre wawename, ngănu gyene mime singi pisi nyene, ingle mime tăăpe me niia singi te mibibine niwadininuge niia gaabe cabu me.

Aceji Seemo me Ätityera ca Mime Ireclota Miiji Gemi

8 ¹Yoo, ai ingle naace gyene Acejiyame mibibine nijinuge, “Weene kălyă gemi,” page lui biname cina Keriso Yeesu cabu temi, teepi lica teeme niia mule me daremu cirege păpăna Acejiyame bau ca. ²Aceji Seemo mibibine ire nitwinuge, niwadininuge Yeesu Keriso me toraca ireclota gaabe cabu. Peei name pi page niia ngene atwanena teepi kokre lica gemi cebine acaname niia gaabe cabu me, piyepu cane asatăneji găne niia mule me budre daremu cabu ca. ³Yoo, Acejiyame me Cotre Mene te äblicăco biname bine miiji gaabe cabu me waadena, ingle binamerage bime kokre ibibi lica gyene teeme niia ngene atwanena äyecrejame. Acejiyame peei name pi nuuja gaabe ne itu jewenuji, teemerage Băgră ne itu tityepuji budre äbitame mime niia mule daremu ne äyebtingtame. Yeesu tăduji biname pana, biname pana ngenecu cama, yepă teeme mara kokre puga ge niia ngene atwanena bine ägyemame. Tabe conocăco enajuji biname bime niia mule äyebngame. ⁴Puma cita ca mine miiji gemi Acejiyame me conocăco cotre bine wawename, mine liba kokre ne acata Aceji Seemo bau ca mime niia ngene atwanena bine äyebngame. ⁵Biname lui cina yaacrajuge teeme tăăpe me singisingi mule cabu, teepi jăje ngene jwaatwananinusi teeme tăăpe me singi wawename, yepă biname lui cina yaacrajuge Aceji Seemo lipu jaajemuge teebibine, teepi jăje ngene jwaatwananinusi Aceji Seemo me singi wawename. ⁶Biname lui cina teeme tăăpe me singi jaawenusi teepi budre gaabe cabu temi. Biname lui cina Aceji Seemo me singi jaawenusi, teepi toraca ireclota gaabe cabu temi, piyepu ngenecu poode pa jăăpănepesi. ⁷Yoo, biname te liba teeme singi mene yăătecijuge, tabe cubuyame pana läbituge Acejiyame tăăpume, ingle naace gyene tabe Acejiyame me Cotre Mene lica yaacatuge, piyepu peei ätecija căco gaabe cabu tabe

äblicäco Cotre Mene wawena. ⁸Yoo, teepi lui cina teemerage singi bine jaawenemusi, teepi äblicäco Acejiyame ne ngenecu miiji me wawena.

⁹Yepä, weene pepu lica gemi. Weene weemerage singi lica jaawenemuye, yepä weene Aceji Seemo me singi jaawenemuye, liba toraca pisi nyene Aceji Seemo weeme trupa cabu je. Yoo, laati bau Keriso me Seemo lica gyene, pui biname cuta lica gyene Keriso me biname.

¹⁰Yepä, Keriso me Seemo liba pisi nyene weeme yepäyepä trupa cabu, weeme tääpe puu budre pagege niya mule name pi, yepä weeme seemo toraca ireclota cama gyene page piyepu iyeteta, ingle naace gyene Acejiyame weebibine teeme tääpume conocäco me ituge wawena. ¹¹Cuta piyepu, liba Acejiyame me Seemo pisi nyene weeme cabu, Acejiyame lui te Yeesu ne budre cabu ca itu erpinantuji, tabe cuta weeme budre tääpe arpinera cirege. Aceji Seemo lui te weeme cabu yaanajuge teeme kokre pisi nyene peei ne wawename.

¹²Yoo, cäme binamewale, ai name pi mine miiji Aceji Seemo me gaabe ne yaacatusi, gone weeme tääpe me singi ne yaacatusi, ¹³ingle weene liba peei mule ne jaawenuye, weene budre daremu cirege päpäna. Yepä, weene liba weeme tääpe me singi ne jäägyuye Aceji Seemo me kokre ca, cuta lica peei niya mule wawename, weene toraca ireclota ne cirege päpäna iyeteta. ¹⁴Lui cina Aceji Seemo me singi yaacatusi, teepi Acejiyame me bägrä gemi. ¹⁵Yoo, Acejiyame Aceji Seemo ne tityepuji weeme cabu lenajame lica weebibine ädretnecame piyepu cääri wälu me wawename, yepä mibibine teeme ingle cabu me waadename. Mine piba miiji gemi teebine awejena egä, “Babe, cime babe.” ¹⁶Aceji Seemo te mime yepäyepä seemo bine jaajananemuge egä, “Maane toraca Acejiyame me bägrä gäte.” ¹⁷Mine lui Acejiyame me bägrä gemi, mine Babe me babo miiji ne teeme bau ca cirege päpäna. Keriso miijirage puupu ne ituge acata teeme Babe bau ca, piyepu mine ten cama gigri cirege lenaja. Page mine poto mäpu bine jääpänemusi mime miiji kaakesea name pi, Keriso lipu mäpu ituge päpäna. Yepä, mine liba teeme tääpume mäpu bine jääpänemusi ai gawecewe cabu, mine cuta teeme jamyacu apaclyera cabu cirege lenaja.

Mine Teeme Jamyacu Apaclyera cabu Cirege Lenaja

¹⁸Cane ngene jotwananenine egä page mime mäpu lui matimatirage gemi jamyacu apaclyera cabu ca, Acejiyame lui ne cirege awabudnita mime tääpume. ¹⁹Iyeta gwidape Acejiyame lui bine itu tewenemuji, teepi cängenarage jewagrijenisi ngälugaabe bimu ne, Acejiyame lui bimu cabu cirege awabudnita teeme jääcräneji bägrä bine. ²⁰Ai ingle naace gyene pui sasa padare cabu ca biname cina liba conocono mule ne niinäce jewenujisi, iyeta gawecewe gwidape cina ocwäwäneji cabu icrajuji. Iyeta gwidape cina singi cängena lenajame, yepä biname bime conocono mule

name pi Acejiyame teebibine pepu ireclota ecäremuji, ingle tabe singi gyene iyeta gwidape cina cängena awagriyame pui bimu täapume teepi Acejiyame me binamewale cama gigri äsecrera ne päpäname ai mäpu ireclota cabu ca. ²¹Yoo, iyeta ai gawecewe gwidape cina cirege äsecrera teeme ocwäwäneji cabu ca, piba mine lui cina Acejiyame me bägrä gemi, teepi mine cama pui jamyacu äsecrera cabu cirege lenaja. ²²Ingle mine umle gemi egä iyeta ai gawecewe gwidape cina keke mene cama cewe loocanininusi, epu pana magebi te lipu bägrä aplimla täapume cewe loocanuge ngälu page. ²³Lica gawecewe gwidape taatu, yepä cuta mine te cewe loocaninininago, pui padare ne cängena jewagriyenis, Acejiyame liba mibibine teeme jājācrāneji bägrä me toraca wawename, mime täape tabe liba äsecrera ai gawecewe mäpu cabu ca. Aceji Seemo lui page mime cabu enajenige, tabe niināce gwidape gyene pui jamyacu ireclota cabu ca mine lui ne cirege päpäna. ²⁴Mine ätrunga cama teeme padare ne jewagriyenis, cuta peei ätrunga ca mine äsecräreji ituge äbita peei jamyacu ireclota ne cirege päpäname. Yoo, mine liba gwidape ne cirege päpäna, siige mine lica ingwe ca awagrija peei gwidape täapume, ingle pisi nyene page. ²⁵Yepä, mine liba camuge päpäna, mine piba cängena ätrunga cama jewagriyenis.

²⁶Yoo, mine liba kokre lica piyepu umle lica gemi lipu mene Acejiyame bau jajime, piba Aceji Seemo te mibibine nitityärininuge. Tabe te Acejiyame ne yaawejanuge mime täapume mara pana mule ca. Teeme irecu ätumuta mule lui miijirage gyene mene cabu ca, ²⁷piyepu Acejiyame lui te jājāpānemuge biname bime singi bine teeme ngenecu bora, tabe cuta piyepu umle gyene Aceji Seemo ngena singi gyene mime täapume. Aceji Seemo te teebine yaawejanuge pui gwidape piyepu mule täapume Acejiyame lui singi gyene teeme ätrunga biname bine ceerame. ²⁸Yoo, mine umle gemi egä iyeta lui te läbituge, peei cabu Acejiyame kaakesea jaawenuge mime miiji täapume, lui cina babo singi gemi teeme täapume, piyepu lui bine tabe biname me itu niwenininuui ten cama iyeteta lenajame. ²⁹Tabe lui biname bine niināce jejäcremuji, teebibine cuta mara me jebenemuji teeme Bägrä Yeesu pana äbitame. Yoo, teeme Bägrä naane me läbituge mime täapume, cuta mine teeme täapume igane gemi. ³⁰Yoo, Acejiyame lui bine mara me ituge wawena, teebibine cuta ala taasoglecemepi, piyepu tabe lui bine ituge ala asogleca, tabe cuta teebibine teeme täapume conocäco me jaawenemepi, piyepu lui bine conocäco me ituge wawena, tabe cuta teebibine teeme jamyacu apaclyera cabu itu yaacranemepi.

**Lipu Baborage Gyene Acejiyame me Owecu
piyepu Singi Mime täapume**

³¹Yoo siige, mine ngena mene jicusi iyeta peei ätityera poto cidi me? Acejiyame liba mine cama gyene, laati te piba ibibi gyene mibibine

toraca niya wawename? ³²Tabe teemerage Bāgrā ne lica sewecnistuji, yepā teebine owecu gaabe cabu tityepuji budre ābitame iyeta mime tāāpume. Peei cabu ca mine umle gemi egā tabe singi iyeta gwidape Bāgrā cama mibibine ceerame. ³³Biname cina āblicāco Acejiyame me jājäcrāneji biname bine jaji egā, “Weene āblicāco Acejiyame gome lenaja, ingle weene conocono gemi.” Teepi āblicāco gemi pepu iicana, ingle Acejiyame te ituge jaji egā, “Weene cāme opo gaabe je conocāco biname gemi.” ³⁴Cuta Yeesu Keriso tabe licarage mibibine aina, yepā tabe lui budre ābituji, piba cuta arpinantuji Acejiyame me camu poto ime gome lenajame, siige tabe Acejiyame ne ewejanenige mime miiji tāāpume. ³⁵Mine liba māpu piyepu pita jāāpānusi, coo āmugetna nuuja biname bau ca; mine liba lolo me cewe piyepu gwidape cāco; coo mine liba drowā biname coo piyepu budre jāāpānusi, nāā pui padare Keriso me singi cuta pisi nyene mime tāāpume? Yoo, pisi nyene. ³⁶Oogārāneji Mene te jiicenige egā,

“Māāme tāāpume teepi singi cibibine budre me agleca iyeta padare bimū gaabegabe.

Mibibine epu niwenininusi maamoi liiyepu, lui me agleca padare mameta gyene.”

³⁷Siige, ngānu gyene ngena te tādenige, Keriso me baborage singi pisi nyene mime bau; tabe nitityāripi mine toraca uutrutame. ³⁸⁻³⁹Cane umle gāne egā nuuja gwidape te āblicāco mibibine āyēblēnga Acejiyame me singi cabu ca. Mime budre cabu piyepu mime ireclota cabu teeme singi pisi nyene. Nuuja kokreyame gwidape epu pana mename seemo coo piyepu cable coo maadubi, teepi āblicāco mibibine āyēblēnga Acejiyame me singi cabu ca. Piyepu page ngena cina ābitininisi cuta ciige ngena cina cire läbitipesi, piyepu ngena pisi nyene dume cabu, coo ngena pisi nyene gawe ngalebora, teepi cuta āblicāco mibibine āyēblēnga Acejiyame me singi cabu ca. Yoo, iyeta Acejiyame lui bine tewenemuji, peei bime nuuja te āblicāco mibibine āyēblēnga Acejiyame me singi cabu ca, mine lui ne jāāpānusi mime Yageyame Keriso Yeesu name pi.

Israēla Biname bime Äjäcra poto cidi me

9 ¹Cane toraca mene jijenininine, lica walya, ingle cane lui Keriso me biname gāne. Cāme ngenecu bora Aceji Seemo te lui ire natwenige, peei cabu ca cane ngene ca eglenine egā cane walya lica gāne. ²Cāme toraca mene aģesa: Cane baborage ngenecu māpu piyepu baborage owecu gāne cāmerage Israēla binamewale poto cidi me, ingle teepi singi lica gemi Keriso me ātityera ne acatame. ³Cane liba ibibi gāne teebibine ātityerame, cane singi cāme puupu Keriso me biname cama teebibine ceerame cane niya puupu me āyēblingtame, yepā peei āblicāco gyene. ⁴Bucurage Israēla biname cina Keriso ne jāāgyusi, puu teepi lui

Acejiyame me sasa cabu ca jājācrāneji biname gemi; cuta tabe jamyacu apaclyera teeme bau itu eboclomtuji, teebibine jāje tejanenanemumi egā, “Cane weeme Acejiyame gāne; weene cāme biname gemi;” puu tabe teebibine cotre mene piiyepu iiwāreja mule itu ecāremuji, cuta piiyepu tabe teebibine mene jejemuji ingwe ca āsecrera biname ne ātyepame; ⁵puu modamoda biname Abrahamo, Isacako, piiyepu Yakobu teeme kaakesaare gemi, cuta piiyepu Keriso liba biname me ābituji, tabe Israela biname ge, yepā teepi teeme Keriso ne jāāgyusi. Yoo, Acejiyame lui te iyeta biname bine yaawademuge, miiji teeme ngii ne awepperājame ngālu cāco. Eso!

⁶Pei lui lica epu egā Acejiyame me jajeji mene toraca lica läbituge, yepā apu egā lica iyeta Israela biname lui Acejiyame me toraca Israela biname gemi. ⁷Piyeju, lica iyeta Abrahamo me kaakesaare lui Acejiyame me bāgrā gemi. Acejiyame Abrahamo ne jejuji egā, “Māāme toraca kaakesaare eei gemi lui māāme bāgrā Isacako bau ca.” ⁸Yoo, lica iyeta Abrahamo me kaakesaare lui Acejiyame me bāgrā gemi, yepā teepi taatu lui cina Isacako me kaakesaare gemi, ingle Isacako itu aplimluji Acejiyame me jajeji mene ibibi me ābitame. ⁹Pui mene lui egā, “Toraca padare te liba tatyaramtenige, cane piba tacnenutenine, siige Saara imābāgrā cama pa waanajepi.”

¹⁰Cuta piiyepu ingwe ca Isacako babo ābituji, coga ocatuji, siige teeme coga Rebeka me padare te liba mameta ge pāādepāde imābāgrā pāpāname, ¹¹⁻¹²Acejiyame piba teebine jojuji egā, “Igane te naane ne cire jaatwepi.” Tabe niināce pei mene Rebeka ne jojuji; Rebeka ingwe ca imābāgrā bine jāāpānuji. Yoo, ingle naace gyene camuge teeme aplimla, pei neeneni imābāgrā lica nuuja miiji coo piiyepu niiya mule ituge wawena pui padare cabu Acejiyame liba teeme mage ne pui mene jojuji. Yoo, lui te ābituji, Acejiyame ngene ca itu egluji pei ne wawename, lica bāgrā bime mule name pi, yepā Acejiyame tabe singi ge pepu wawename. ¹³Oogārāneji Mene pisi nyene pei poto cidi me Acejiyame lui jiicuji egā, “Cane Yakobu tāāpume singi ābitujine, yepā Esau ne jigyuji.”

¹⁴Nāā, weene ngene jotwananiniye egā Acejiyame me mule conocono gyene? Pepu gone! ¹⁵Ingle Acejiyame Moose ne itu jejuji egā, “Cane laati ne singi ātityerame, cane pei biname ne yāātityārune. Cāme bau sine laati me tāāpume cane owecu läbitune.” ¹⁶Yoo, Acejiyame liba biname ne jaajuge, coo lica jaajuge, pei lui biname me singi piiyepu wawena cabu ca lica birige, yepā naace name pi egā Acejiyame singi pui biname ne owecu wawename. ¹⁷Oogārāneji Mene cabu Acejiyame te Aikupito Mopeyame ne jejuji egā, “Cane meebine Mopeyame me naawenuji, ai ingle naace popi cane singi maane cāme kokre ne awabudnitame biname bime tāāpume, cuta piiyepu ai ingle naace popi egā iyeta biname ai gawecewe cabu umle ābitame cāme ngii poto cidi me.” ¹⁸Yoo, pei mene

cabu ca mine umle läbitinago egä Acejiyame liba singi biname ne owecu wawename, tabe jaawenuge; coo piyepu tabe liba singi nuuja biname ne ätecija cäco wawename, tabe cuta peei ne jaawenuge.

**Acejiyame Umle Gyene Mäpu Daremu Ceera Biname bine;
coo Cuta Umle Gyene Owecu Wawename Biname bine**

¹⁹Cäme binamewale, pama weeme yepä te singi gyene cebine ätemlame egä, “Acejiyame me mule liba pepu gyene, tabe piba äblicäco biname ne aitna teeme ätecija cäco mule täöpume, ingle biname te äblicäco Acejiyame me singi äsäda.” ²⁰Yoo, cäme biname, maane laasi näte? Nää, maane ibibi gäte Acejiyame ne äseblecäjame? Maane biname gäte. Määme ireclota epu pana gyene diiba liiyepu. Diiba te miiji lica teeme raranga biname ne ätemla egä, “Maane cebine apu ngenome nawenite?” ²¹Ingle naace gyene diiba raranga biname te miiji ge teeme singi gwidape ne wawena teeme laame cabu ca. Tabe miiji ge neeneni diiba raranga yepä laame tomi cabu ca, yepä diiba ne raranga miijimiji kaakesea täöpume cuta nuuja ne raranga domäji täöpume.

²²Yoo, Acejiyame me mule pepu pana gyene. Tabe miiji gyene biname bine awabeja egä tabe singi lica gyene niiya mule täöpume, cuta teeme kokre pisi nyene niiya mule biname bine äyeb lengame. Yepä, tabe wata lica yäyeb lengemuge. Tabe däägudägu läbitanuge biname bime täöpume lui bime niiya mule name pi tabe teebibine miiji gyene äyeb lengame. ²³Tabe cuta singi gyene teeme jamyacu apaclyera ne aboclomtame mime täöpume, tabe lui bine owecu niwenininige, lui bine tabe ituge miiji me waweneca teeme apaclyera täöpume. ²⁴Mine peete nemi tabe lui bine itu ala nisoglicipi: lica eei taatu bine lui cina Israela biname bime cabu ca gemi, yepä cuta eei bine lui cina nuuja gawe biname bime cabu ca gemi. ²⁵Agesa teeme mene jäjäcra poto cidi me teeme mename biname Hosea lui soogäruji egä,

“Cane nuuja biname bine cäme bägrä me cire jaawenemepene,
lui cina lica cäme ingle cabu ituge.

Cane teebibine owecu cire jaawenemepene,
lui cina cäme owecu cabu lica ituge lenaja.

²⁶Cuta lui gawe cabu biname bine ituge jaji egä,

‘Weene lica gemi cäme ingle biname,’

puma cane teebibine cirege jaji egä,

‘Cane lui Iyeteta Lenajayame gäne, weene cäme bägrä gemi.’”

²⁷Cuta nuuja mene pisi nyene Oogäräneji Mene cabu mename biname Isaya te jiiucuji Israela biname bime poto cidi me egä, “Israela biname cina bucurage cire läbitipesi epu pana secre liiyepu, yepä mime Yageyame te teeme cabu ca nesae pana biname taatu cire yaawademepi; ²⁸ingle tabe biname bine cirege jaatranemepi poto biname piba wata äyeb lenga

teeme opo gaabe ca.” ²⁹Yoo, Isaya cuta nuuja ciige mene ituge jaji egä, “Yageyame teeme kokre baborage gyene. Tabе liba owecu lica gyene mine Israela biname bime tääpume, tabe mibibine iyeta cire nibyageceji, epu pana tabe Sodoma piiyepu Gomora cewe biname bine lipu itu jiiybagecemuji. Yoo, piba mime nuuja kaakesaare lica cirege.”

Acejiyame me Miiji Mene ne Israela Biname cina Lica Jäätrungusi

³⁰Yoo, cane ngena poto cidi me jiićenine aģesa: Gawе maramara biname lui cina lica teemämu läbitininusi Acejiyame tääpume conocäco äbitame, Acejiyame teebibine conocäco me itu jaawenemepi, ingle naace gyene teepi teebine jäätrungepesi, ³¹yepä Israela biname teepi cotre mule ne liba jäärngusi peei cabu ca Acejiyame tääpume conocäco äbitame, teepi conocäco lica jääpänusi. ³²Ingle aģesa: Teepi teeme waweneca mule ne jäätru-ngusi, cuta lica Yeesu ne jäätrungusi teeme conocäco tääpume. Peei toraca mene Yeesu me budre poto cidi me, teepi lui ne opo lica yaawatnepesi, epu pana gyene teeme gaabe cabu kula liiyepu, teepi lui ne lica jääpänusi, piba peei cabu ca yaatrametnemuge. ³³Pisi nyene Oogäräneji Mene peei poto cidi me egä Yeesu lui epu pana gyene kula liiyepu Israela biname bime tääpume. Mene aģesa:

“Ire, cane kula ne yaacitene Yerusalemа cewe cabu Siiyona podo cabu je, lui te jaawenemuge biname bine naabe atropengäja, eei kula lui te teebibine jaawenemuge atrametname.

Yepä, lui cina teebine jäätrungusi,
teepi lica birige ajiri me äbita,
yepä miiji lenaja ne jääpänusi.”

10 ¹Cäme ätrunga binamewale, cäme babo singi pisi nyene cämerage Israela biname cina conocono mule cabu ca äsecrera iyeteta ireclota ne päpäname. Cane Acejiyame ne peei tääpume ewejanenine. ²Cane teeme mule poto cidi me weebibine umle jiwenininine egä teeme toraca singi pisi nyene miiji kaakesea Acejiyame tääpume wawename, yepä teepi toraca umle lica gemi lipu gyene Acejiyame me biname me äbitame. ³Teepi toraca gaabe ne opo lica yaawatnusi Acejiyame te lipu biname bine teeme tääpume conocäco me jaawenemuge. Teepi singi gemi teemämu gaabe wawename cuta singi lica Acejiyame te teebibine teeme tääpume conocäco wawename teeme gaabe ca. ⁴Yoo, Keriso te cotre wawena mule ne ngälu me ituge acita biname cina peei ca conocäco me äbitame, ai ingle naace popi iyeta biname lui cina teebine jäätrungusi, siige teepi conocäco läbitininusi Acejiyame me opo gaabe je.

Äsecrera Gaabe Pisi Nyene Iyeta Biname bime tääpume

⁵Siige, Moose te mene itu soogäremuji cotre wawena mule ca Acejiyame me opo gaabe je conocäco me äbitame apu egä, “Laati te

cängena jaawenemuge iyeta gwidape lui poto cidi me cotre mene te jiicenige, tabe peei cabu ca iyeteta ireclota cirege pöpäna.” Yepä, biname cina äblicäco peei ne wawena. ⁶Yepä, nuuja mene pisi nyene ätrunga ca conocäco äbitame apu egä: “Biname te äblicäco otni cabucewe me Keriso ne äiname, ⁷piiyepu biname te äblicäco otni piiyemrage cupicu cabu me Keriso ne puma cita ca acaname.” ⁸Yoo siige, teeme nuuja ingle lica gyene pepu wawename, ingle Keriso itu tänuuji biname bine ätityerame piiyepu cuta itu arpinantuji budre cabu ca. Biname lui cina cime mene Keriso poto cidi me jäätrungusi, teepi peei ca Acejiyame täapume conocäco läbitininusi. Moose te jiicuji egä, “Acejiyame me mene cudecewe lica gyene, yepä weeme ngenecu bora piiyepu weeme tage cabu pisi nyene.” ⁹Peei name pi weene liba tage ca jiicemuye egä, “Yeesu lui cäme Yageyame,” piiyepu ngenecu cama jäätrunguye egä, “Acejiyame te Yeesu ne budre cabu ca erpinantuji,” weene piba äsecräreji gemi iyeteta ireclota pöpäname. ¹⁰Ingle naace gyene mine liba ngenecu cama jäätrungusi, mine Acejiyame täapume conocäco läbitininusi, cuta liba tage ca peei ätrunga poto cidi me jiicemusi, mine äsecrera gaabe ne jääpänusi. ¹¹Yoo, Oogäräneji Mene te jiicenige Keriso poto cidi me egä, “Lui cina teebine jäätrungusi, teepi lica ajiri me äbita, yepä miiji lenaja ne jääpänusi.” ¹²Peei mene lui iyeta biname bime tääpu myene, ingle naace gyene gaabe mara lica gyene Israela biname bime täapume piiyepu nuuja gawe biname bime täapume. Keriso lui yepä Yageyame gyene iyeta ätrunga biname bime täapume. Tabe babo miiji jaawenemuge iyeta lui cina teebine yaawejanusi. ¹³Oogäräneji Mene cuta jiicenige egä, “Iyeta biname lui cina Yageyame me ngii yaawejanusi, tabe teebibine niiya cabu ca cire yääsecräremepi.”

¹⁴Yepä, biname cina teebine lipulipu yaawejanusi, liba teeme ätrunga lica? Piyyepu teepi lipulipu jäätrungusi, liba peei mene lica ituge ätecija? Cuta piyyepu teepi lipulipu yäatecijemuge, teebibine liba mene lica ituge jaji? ¹⁵Piyyepu biname cina peei mene teebibine lipulipu jaajemusi, teepi liba lica ätyepäneji gemi? Oogäräneji Mene pisi nyene egä, “Babo miijirage gyene teeme otni lui cina Miiji Mene yaacanusu.” ¹⁶Yepä, lica iyeta biname cina peei Miiji Mene ne yaacatusi. Sasa mename biname Isaya te jiicuji egä, “Yageyame, laati te cime mene jäätrungepesi?” ¹⁷Yoo, biname cina niinäce mene yäatecijemuge, piba jäätrungusi, piyyepu biname cina miiji Keriso poto cidi me mene jajanena nuuja biname cina ätecijame.

¹⁸Yoo, Israela biname bime poto cidi me, cane singi gäne jajime egä teepi peei mene itu itecijemuji. Oogäräneji Mene pisi nyene peei poto cidi me egä,

“Mename biname cina ituge otni iyeta poto ta.

Pui Miiji Mene itu waatnetnäjepi iyeta gawecewe cabu teepi luma icrajuji.”

¹⁹Cuta piiyepu Israela biname bime padare puga ge cāngena umle äbitame. Niinäce Moose te Acejiyame me mene Israela biname bine jejemuji egä,

“Cane gawe maramara biname bine miiji cire jaawenemepene,
weene piba ngenecu bora claabe me cire äbitipeye teeme miiji
poto cidi me,
biname lui bine weene yaainemuye ‘umle cāco biname’ ca.”

²⁰Cuta Isaya Acejiyame me mene nuuja gawe biname bime umle poto cidi me wālu cāco jicemuji egä,

“Biname cina cebine ituge päpäna,
lui cina lica nārngenusi.

Cane teeme bau me itu laboclomtepene,
lui cina cāme täöpume lica nätemlusi.”

²¹Yepä, Israela biname bime poto cidi me tabe jicemuji egä,

“Iyeta bimu cane ime uutanujine ngālu māmle teebibine cāme bau
awecname,
yepä teepi ätecija cāco piiyepu ägyiägyi biname gemi.”

Acejiyame Israela Biname bine Owecu Jaawenemuge

11 ¹Cane weebibine itemlininine egä Acejiyame nää teeme Israela biname bine ituge jägyi? Eewe, licarage! Cane age sāne yepä Israela biname, Abrahamo me kaakesaare gāne, Benjamina me ingle cabu ca. ²Yoo, Acejiyame lui bine niinäce jejäcremuji, teebibine lica iyebngemuji. Weene umle gemi Oogärāneji Mene Eliya poto cidi me, tabe Israela biname bine lipu jeitnäjemuji, Acejiyame ne jejuji egä, ³“Yageyame, teepi määme mename biname bine ituge agleca piiyepu määme iiwāreja dade bine ituge iiglicneja. Cane taatu ātrunga cama gāne, piiyepu teepi singi cuta cebine aglime.” ⁴Agesa Acejiyame me daremu mene: “Eewe, maane taatu lica gāte. Cāme seben tausen biname piti nemi, lui cina kokorare lica ituge äpedna pui uuje ngii Baala täöpume teebine awejename.” ⁵Page cuta pepu gyene: mine nesae pana biname piti nemi Acejiyame lui bine ituge jājācra teeme owecu name pi. ⁶Tabe biname bine jājācremuge owecu name pi, lica pui biname bime miiji mule name pi. Yoo, Acejiyame liba yepä biname ne jaajuge miiji mule name pi, peei jaji lui daremu pana birige miiji mule täöpume, yepä pepu lica gyene. Acejiyame biname bine jājācremuge toraca owecu name pi.

⁷Yoo, Israela biname cina lica jāpānusi teepi ngena täöpume jārngusi, yepä pui nesae pana biname Acejiyame lui bine jejäcremuji, teepi jāpānusi. Nuuja Israela biname cina ätecija cāco läbitininusi. ⁸Peei ätecija cāco mule poto cidi me Oogärāneji Mene pisi nyene egä,
“Acejiyame teebibine ngene atwanena dumā itu jewenemuji.
Teepi irecu ca lica päpäna,

tablame ca lica ätecija Keriso poto cidi me, ngälu page.”

⁹Cuta peei poto cidi me Daawida te jiiucuji Oogäräneji Mene cabu nuuja poto ca egä,
 “Teepi dade cabu adnatäreji gemi deedei tääpume.
 Teepi ngene pa jwaatwananipesi egä, ‘Poode pisi nyene Acejiyame cama,’
 yepä teeme ätecija cäco mule te teebibine pa joomlemepi.
 Dici abrenuteji gyene.
 Teepi pa yaatrametnemepesi, teeme mäpu daremu pa jääpänepesi.
¹⁰ Teepi irecu määsumäsu pa läbitipesi,
 piba teepi äblicäco päpäna.
 Teepi äcupenapena otni teeme mäpu name pi.”

¹¹ Yoo, Israela biname cina teeme ätecija cäco mule name pi
 yaatrametnemuge, yepä teeme atrametna iyeteta lica gyene. Israela biname bime mule name pi Acejiyame te nuuja gawe biname bine padare ecäremuji teeme biname me äbitame. Israela biname cina piba ire patre pa yaaglecemepesi nuuja gawe biname bine teeme miiji name pi, cuta teepi piba singi pui Miiji Mene ätecijame. ¹² Yoo, Israela biname bime niia mule name pi nuuja gawe biname cina babo miiji ne ituge päpäna. PEEI miiji cuta baborage cire läbitepi, iyeta pui jäjäcräneji Israela biname liba ireclota biname bime tomi cabu cirege äbäcna.

Olibi Uli cabu ca Mine Acejiyame me Mule Opo Yaawatnusi

¹³ Yoo, weene gawe maramara biname, ai mene lui weeme tääpume. Cane lui Acejiyame me ätyepäneji biname gäne weene gawe maramara biname bime bau me, cuta piiyepu peei kaakesea cäme tääpume babo miijirage gyene. ¹⁴ Cane yaapicetnärune cäme Israela biname bine ire patre agli me wawename pama poto cina Acejiyame me owecu mule cabu äbäcname iyeteta ireclota ne päpäname. ¹⁵ Acejiyame Israela biname bine liba ebmalemuji teeme ätecija cäco mule name pi, tabe piba nuuja gawe biname bine teeme biname me jewenemuji. Yepä, Israela biname cina teeme ätecija cäco mule ne liba cire yaabmalepesi, Acejiyame cuta teebibine cire yaawademepi. Teepi piba epu pana budre biname liiyepu lui cina täcnärepi ireclota me.

¹⁶ Calwacupi ire acita mule pisi nyene yepäyepä deedei waadename iyeta deedei aboclomäjame miiji tääpume. Yoo, pepu pana Israela biname bime tääpume cirege äbita. Abrahamo lui Acejiyame me ingle cabu ge, piiyepu teeme kaakesaare Acejiyame me ingle biname cirege äbita. Yoo, Israela biname lui epu pana gemi uli liiyepu: teeme braju liba Acejiyame memi, teeme ciipe cuta teemi nemi. ¹⁷ Yoo, Olibi uli cabu ca mine Acejiyame me mule ne opo ewatnenisi. Biname te poto ciipe bine yaacnapecmuge teeme ätemäneji olibi uli cabu ca, piba pui ciipe bime puupu cabu tuwängle

me glunu bora olibi uli me ciipe bine jätätümuge puma uutaname pui calwacupi uli cabu. Weene nuuja gawe biname lui epu pana peei glunu bora olibi uli me ciipe gemi. Page weene kokre piiyepu miiji bine jätänemuye Israela biname cama, peei glunu bora olibi uli me ciipe teeme ngedo ne lipu yaacatusi ätemäneji uli me braju cabu ca. ¹⁸Weene gone gawe me jaawenemuye Israela biname bine, lui bime puupu weene ituge waadena. Weeme nuuja ingle lica gyene weemämu awepyeräja. Weene ciipe pana gemi, lica braju pana. Weene weeme kokre yaacatusi braju cabu ca.

¹⁹Pama weene apu ngene jotwananiniye egä, “Yoo, peei niinäce ciipe bine ituge acnapa cime täöpume puupu wawename.” ²⁰Peei toraca gyene. Teepi acnapäneji ge, ingle naace popi teepi ätrunga cäco gemi, egäcäro weene teeme puupu cabu inajaninuge, ingle naace popi weene Keriso ne jätätunguye. Yepä, weene gone ngenecu pudupudu; weene ire cängena inajipi! ²¹Acejiyame te lica Israela biname bime ätrunga cäco mule ne ire taatu jaacituge, yepä teebibine ituge äyebenga teeme puupu cabu ca, ngänu gyene teepi lui ätemäneji uli me ciipe pana gemi. Peei name pi tabe cuta lica weebibine papa ire taatu jicitinuge. ²²Weene miiji peei cabu ca abiberäja egä Acejiyame me owecu pisi nyene cuta piiyepu teeme ablaweja. Tabe Israela biname bine kokre cama yaablawemuge lui cina ätecija cäco gemi, yepä tabe weebibine owecu jiweninuge weene liba teebine jätätunguye. Yepä, weeme ätrunga mule weene liba abmala, weene acnapäneji ciipe pana pagege äbita. ²³Israela biname cina liba teeme ätecija cäco mule ne yaabmalusi Yeesu ne ätrungame, Acejiyame piba teebibine teeme puupu cabu cääri pa yaacranemepi weene cama. Teeme kokre pisi nyene peei ne wawename. ²⁴Yoo, weene nuuja gawe biname lui glunu bora olibi uli ciipe pana gemi, biname te lui ciipe bine icnapemige, ewademige, puu opopo gyene, siige teeme ätemäneji uli cabu erpecnemige. Yepä, Israela biname lui ätemäneji uli ciipe pana gemi. Acnapäneji ciipe seeji plowa gyene cääri arpetna pui yepä uli cabu.

Acejiyame te Iyeta Biname bine Owecu Jaawenemuge

²⁵Cäme ätrunga binamewale, pisi nyene mene lui ne lica ituge awabudnita, yepä cane singi gäne weebibine umle wawename naace täöpume weene piba weemämu lica awepyeräjame. Agesa peei mene: Israela biname bime ätecija cäco mule lica gyene iyeteta, yepä peei mule me ngälu gaabe pisi nyene. Iyeta nuuja gawe biname Acejiyame lui bine ituge jätäcra, teepi liba teeme bau cirege atyareca, ²⁶piba iyeta jätäcräneji Israela biname cina cire latatrongäripesi Yeesu Keriso bau me. Acejiyame cuta teebibine cire yäasecräremepi iyeteta ireclota cabu me waadename. Teeme Oogäräneji Mene cuta pisi nyene peei poto cidi me egä, “Äsecerä biname te cire tädepi Siiyona podo cabu ca Yerusalema cewe je.

Taba Yakobu me kaakesaare bine cire yaatrongäremepi teeme niya mule cabu ca.

27 Cane ai jajeji mene cire jaawenemepene teeme täápume,
cane liba teeme niya mule bine cire yäáyeblengäjemepene.”

28 Yoo, page bucurage Israela biname lui cubuyame pana gemi Acejiyame me Miji Mene poto cidi me, siige weene nuuja gawe biname cina babo miiji ne peei cabu ca ituge päpäna. Yepä, Acejiyame me owecu pisi nyene Israela biname bime täápume, ingle tabe teebibine ituge jājäcra, cuta mene itu ecäranemuji teeme sasa kaakesaare bine egä, “Weeme kaakesaare cina cäme singi biname me cirege lenaja.” 29 Yoo, Acejiyame me jājäcra lui iyeteta gyene; tabe lica teeme miiji ne acwecnista, cuta lica teeme mene ne mara me wawena. 30 Yoo, niinäce padare cabu weene nuuja gawe biname cina Acejiyame me singi lica jaawenuye, yepä page weene Acejiyame me owecu ne ituge päpäna, ingle Israela biname cina teeme mene lica itu jecatuji. 31 Yoo, page teepi ätecija cäco gemi, ingle Acejiyame me owecu pisi nyene weene nuuja gawe biname bime bau, yepä teepi teeme niya mule ne cire yaabma-lepesi cuta Acejiyame me owecu weene cama cirege päpäna. 32 Ingle naace gyene Acejiyame iyeta biname bine joomlemuge niyaniya mule cabu, naace täápume tabe teebibine iyeta owecu cama yäätityäremuge.

Mine Miji Acejiyame ne Awepyeräja

33 Acejiyame babo miijirage gyene biname bime täápume. Taba babo ngene atwanena cama piyepu babo umle gyene. Nuuja biname te äblicäco gyene teeme ngene atwanena aboclomäja. Nuuja biname te äblicäco gyene ingle ne päpäna teeme mule poto cidi me. 34 Oogäräneji Mene pisi nyene egä,

“Laasi nyene biname lui te umle gyene Yageyame me ngene atwanena?

Laati te ibibi gyene teebine umle mene jajanename?

35 Laati te teebine nuuja gwidape ituge ceera,
tabe lui täápume miiji daremu awecnistame?

Nuuja biname te äblicäco peei mule bine waweneca.”

36 Yoo, iyeta gwidape cina seclenige teeme bau ca, iyeta gwidape cina teeme kokre cabu icrajinige, piyepu iyeta gwidape teeme awepyeräja täápume icrajinige. Mine miiji teebine yaawepyeräjesi ngälu cäco. Siige, pepu yaanajege!

Mine Lipulipu Lenaja Acejiyame täápume

12 1 Yoo, cäme binamewale, Acejiyame te babo owecu cama mibibine maramara ätityera nicärininuge, peei name pi cane weebibine jijenininine weeme ireclota teebine toraca ceerame. Weene

liba ai ireclota cabu weeme tääpe piiyepu weeme ngenecu teebine ceera teeme singi taatu wawenecame, Acejiyame piba ngenecu miiji gyene weeme tääpume. Peese nyene toraca gaabe teebine awepyeräjame.

² Ai gawecewe me mule bine gone jaawenemuye! Gawecewe biname bime singi weemämu gone yaawaduye! Yepä, weeme ngene atwanena Acejiyame ne yääcäruye tabe kirece me wawename. Weene piba taatu miiji gemi teeme singi poto cidi me umle äbitame egä ngena mule gyene miiji, ngena gyene toraca teeme tääpume, piiyepu ngena gyene conocäco.

³ Cane ai mene iyeta weebibine jijenininine, ingle naace gyene Acejiyame baborage owecu piiyepu ätityera cebine ituge ceera. Gone ngene jwaatwananinuye egä weene baborage gemi, yepä weene miiji weemämu cängena atrana egä weeme Acejiyame miiji ätrunga liba babo gyene. ⁴ Yoo, biname me tääpe cabu maramara piicwa gemi. Pui piicwa maramara teeme cuta maramara kaakesea piti nemi. ⁵ Yoo, Keriso bau ätrunga biname teepi bucurage gemi, yepä mine iyeta lui epu pana gemi yepä biname me tääpe liiyepu. Yeesu Keriso lui mope gyene, piiyepu mine lui teeme tääpe me piicwa pana gemi. ⁶ Acejiyame mibibine kaakesea maramara ituge ceera, piiyepu kokre peei kaakesea cängena wawename. Epu pana maramara piicwa bime kaakesea lipu maramara gemi, mine cuta pepu gemi. Mine miiji mimerage kaakesea cängena wawena Acejiyame te lipu kokre nicäranininige. Nuuja me kaakesea lui Acejiyame me mene jajanename, tabe miiji iyeta teeme ätrunga ca cängena jaajanemuge. ⁷ Cuta nuuja me kaakesea lui ätrunga biname bine ätityeräjame, tabe miiji teebibine cängena yäätityäremuge. Nuuja me kaakesea lui biname bine abiberäjame, tabe miiji cängena yaabiberäjemuge teebibine. ⁸ Nuuja me kaakesea lui biname bine bäärmi agedname, tabe miiji bäärmi mene cuta cängena jaajanemuge. Nuuja me kaakesea lui teeme poto gwidape ceerame, tabe miiji camlecamle yääcäruye. Nuuja me kaakesea lui biname bine waadename, tabe miiji teebibine cängena yaawademuge gloose cäco. Cuta nuuja me kaakesea lui owecu cama ätityerame biname bine lui cina ngenecu mäpu cama gemi, tabe miiji gege ngene atwanena cama toraca yäätityäremuge.

Toraca Owecu Lipu Gyene

⁹ Sinäme owecu gone! Weene iyeta niiya mule jäägyemuye, yepä miiji mule bine ewademeye ireclota tääpume. ¹⁰ Nanigane wäsi lipu singi gegi, weene pepu pana owecu jaawenemuye weeme ätrunga binamewale bine, piiyepu nuuja ne opo gaabe me wata yaacituye. ¹¹ Weene durau gone, yepä kaakesea kokre cama jaawenemuye; iyeta weeme ngenecu piiyepu seemo cama jaawenemuye Acejiyame tääpume. ¹² Weene gege ngenecu cama inajininuge, ingle weene umle gemi egä Acejiyame me babo miiji pisi nyene weeme tääpume. Mäpu liba weeme bau me läduge, weene miiji

bojācu cama awagriyame Acejiyame me ätityera täápume, piyepu iyeta padare Acejiyame ne yaawejanuye. ¹³Weeme nuuja ätrunga biname cina liba gwidape singisingi yaacrajuge, weene teeme mäpu cabu teeme singi gwidape yääcäremuye, cuta piyepu gaabe cabu otnetneja biname bine ala taasoglecemuye teeme deedei piyepu ute puupu ceerame.

¹⁴Nuuja biname liba weeme täápume conocono piyepu claabe, weene Acejiyame ne yaawejanuye teeme miiji täápume, gone awejena teeme niia daremu täápume. ¹⁵Nuuja cina liba gege gemi, weene miiji cuta gege äbita ten cama. Nuuja cina liba ele yaangenetnemuge, weene miiji ele angenetna ten cama. ¹⁶Weeme owecu te miiji yepä pana äbita iyeta biname bime täápume. Weene apu gone ngene jwaatwananinuye egä, “Cane baborage gäne poto biname cabu ca,” yepä ajiri gone läbitininuye matikolä biname cama lenajame, piyepu durau gone weeme singi cäco kaakesea ne wawename. Cuta weene gone apu ngene jwaatwananinuye egä, “Cane taatu säne umle cama biname.”

¹⁷Nuuja biname te liba weebibine conocono jiwenininuge, weene gone daremu jaawenuye. Weene miiji mule taatu jaawenuye, piba biname cina äblicäco gemi weeme mule aitneja. ¹⁸Gone nuuja biname ne claabe me wawena piyepu gone teeme claabe ne daremu wawena. Yoo, iyeta biname cama weene poode cama inajininuge. ¹⁹Cäme ngenecurage binamewale, niia mule daremu awecnista gone, yepä peei awecnista yaabmaluye Acejiyame bau me. Oogäräneji Mene pisi nyene egä, “Yageyame te jiicenige: ‘Niia mule daremu lui cäme ime cabu sine; cane te cirege ceera.’ ” ²⁰Peei name pi weeme cubuyame te liba loolomecewe, weene teebine deedei yääcäruye. Tabe liba niye täápume singi, weene teebine niye yääcäruye nanime. Yoo, weeme miiji mule name pi tabe piba ajiri me läbituge. ²¹Gone niia ne padare ceera weebibine apremelame, pätä weene niia cabu ca yuutrutuye miiji mule ca.

Weeme Mope Biname bime Mene Itecijinuge

13 ¹Iyeta mope biname lui cina biname bine ire jaatwemusi, Acejiyame te teebibine pui kaakesea cabu yaacrajemuge, peei name pi mine miiji teeme kaakesea mene ätecijame. Yoo, iyeta kokre nuuja biname bine ire atwime lui Acejiyame bau ca gyene. ²Laatibi teeme mope biname bime mene jäägyusi, teepi cuta Acejiyame me singi ne jäägyusi. Teepi teeme mäpu daremu pagege päpäna. ³Miiji mule biname cina wälu lica gemi teeme ire atwi biname bime täápume, yepä conocono mule biname teepi wälu gemi. Weene liba singi lica ire atwi biname täápume wälu äbita, weene piba conocäco mule jaawenemuye. Teepi piba weebibine pa iwepyeräjipesi. ⁴Acejiyame te ire atwi biname bine teeme kaakesea yääcäremuge weeme miiji täápume. Yepä, weene liba conocono jaawenemuye, weene miiji wälu, ingle naace gyene teeme kokre cuta pisi

nyene biname bine mäpu cabu acraname. Teepi Acejiyame me kaakesea bägrä gemi niya mule daremu ceerame. ⁵Peei name pi weene pui biname bime cotre bine cängena jaawenemuye, piba teeme mäpu daremu ne lica jääpänuye. Cuta nuuja ingle pisi nyene cotre bine wawenecame: Weene ngene ca yaagluye egä peei mule lui toraca gyene.

⁶Peei neeneni ingle name pi weene cuta weeme täks rarekaake yaacranemuye. Peei täks rarekaake cabu ca weeme ire atwi biname cina teeme kaakesea daremu jääpänusi. Piba teepi teeme kaakesea cängena jaawenemusi, Acejiyame lui ire atwi kaakesea ne teebibine ituge ceera. ⁷Yoo, lui cotre piti nemi rarekaake uutecrena poto cidi me, weene peei cotre bine jaawenemuye, rarekaake yääcäremuye. Cuta opo gaabe yaacranemuye weeme ire atwi biname bine piyepu matimati ätityera teebibine yääcäremuye.

Biname cina Miiji Owecu cama Lenaja

⁸Weene yaawecnemuye gwidape bine piyepu rarekaake bine teeme padare cabu, pätä weene äblicäco singi me ibi awecnista, peei name pi iyeta padare weene miiji weemeweme singi läbitaninago. Yoo, lui biname te teeme nuuja biname täapume singi läbitanuge, pui mule cabu tabe Acejiyame me cotre mene birige wawena. ⁹Acejiyame me cotre mene lui apu egä: “Sargi mule gone jaawenuye; gone nuuja biname ne budre me yaagluye; gone gwidape ero ca yaawaduye; piyepu gone gwidape täapume singisingi läbitininuye,” cuta pepu pana cotre iyeta, teepi yepä babo cotre ngalebora gemi. Agesa pui babo cotre: “Maane miiji nuuja biname bime täapume epu singi äbitena, maane lipu mäame täapume singi läbitanute.” ¹⁰Apu gyene, ingle biname te liba nuuja biname bime täapume singi läbitanuge, tabe teebibine lica nuuja niya jaawenemuge. Yoo, peei name pi liba biname te biname täapume singi läbituge, tabe iyeta cotre bine cuta jaawenemuge.

¹¹Yoo, mine miiji cängena lenaja, ingle mine umle lica luma ngänu cerämu padare pisi nyene. Padare te itu tatyaramtumi weene ute pana lenaja cabu ca arpinerame, ingle mime äsecrera ai ireclota cabu ca iyeteta ireclota cabu me lui mametarage gyene pui padare cabu ca mine liba Yeesu ne niinäce jäätrungujisi. ¹²Yoo, ciye pana padare mameta gyene awala, Yeesu me acnenua padare te mameta gyene atyaramta. Miiji mine krokeciye pana mule ne yaabmalesi, apacyera pana mule ne yaacatesi, lui cabu kokre aclajutame. ¹³Mine miiji epu pana cängena lenaja, biname cina apacyera cabu lipu yaacrajuge. Siige iyeta sice buduma mule; siige iyeta sargisargi mule, siige iyeta mene abaja cuta piyepu iyeta ämugetna. ¹⁴Yoo siige, page mine Yageyame Yeesu Keriso me mule bine ewademeye, peei name pi weene niya singisingi ngene atwanena gone padare ceera.

Mime Ätrunga Binamewale Gone Äingeja

14 ¹Lui Ätrunga biname ngenecu onyaonya pana gemi, teebibine weeme ingle cabu yääbäcnuye, piyepu gone mene ca jäingäjinyue teeme singi mule poto cidi me. ²Poto ätrunga biname apu jicenisigi egä, “Iyeta maramara cibi deedei miiji mime täapume ärwäjame, ingle iyeta deedei iyeta cibi lui Acejiyame bau ca gemi.” Nuuja poto ätrunga biname apu ngene jotwananinisi egä, “Poto cibi aletna puupu cabu ca lui uuje bine iiwäräjeji gemi, peei name pi cine singi lica gemi cibi mäju ärngäjame, yepä calwacupi deedei taatu ärwäja.” ³Yoo, ätrunga biname lui cina umle gemi cibi cama deedei ärwäja, teepi miiji lica nuuja ätrunga biname ne aina egä, “Taba onyaonya ngenecu biname gyene.” Cuta piyepu lui cina umle cäco cibi cama deedei äbita, teepi miiji lica teeme nuuja poto biname bine, lui cibi umle gemi, aitneja egä, “Conocono mule biname gemi.” Teepi miiji lica nuuja biname ne pepu aitneja, ingle naace gyene pui lui Acejiyame me biname gyene. ⁴Yoo, biname te äblicäco nuuja biname me kaakesea bägrä ne ablaweja. Peei lui teeme yageyame me kaakesea gyene. Taba te teebine jaatranuge egä miiji gyene coo niya gyene. Yoo, yepä pana gyene: mine miiji lica nuuja biname poto cidi me aitneja egä, “Taba conocono biname gyene,” ai ingle naace gyene teeme yageyame lui Acejiyame sine. Teebine Acejiyame bau ebmalepeye! Taba te teebine umle pa jaawenepi teeme mule liba conocono gyene. Taba ätrunga cabu cängena pa jaaclajutepi, ingle Acejiyame te miiji gyene teebine toraca gaabe awabame.

⁵Yoo, yepä ätrunga biname te singi poto bimu bine mara me wawename teeme mule ca Acejiyame täapume, yepä nuuja ätrunga biname te singi lica gyene pepu mule wawenecame, ingle taba apu ngene jwaatwananuge egä nuuja bimu te mara lica gyene Acejiyame täapume. Yoo bimu maramara poto cidi me, iyeta biname cina miiji cängena ngene atwanena, piba ngene ca agli lui mule miiji gyene teeme täapume. ⁶Lui ätrunga biname cina singi gemi poto bimu mara me wawename, teepi pepu jaawenemusi Acejiyame ne awepyeräjame, piyepu lui ätrunga biname cina umle gemi cibi cama deedei äbitame, teepi cuta Acejiyame ne yaawepyeräjusi, liba teebine eso yääcärusi teeme deedei täapume. Yoo, lui ätrunga biname cina umle cäco gemi poto cibi ärngäja, ingle teepi singi lica peei cabu ca uuje ne awepyeräjame, teepi cuta Acejiyame ne yaawepyeräjusi teeme mule ca, ingle naace popi teepi teebine cuta eso yääcärusi teeme deedei täapume. ⁷⁻⁸Mine lui ätrunga biname gemi, iyeta mime ireclota cabu cuta piyepu mime budre padare cabu mine miiji Acejiyame taatu ne awepyeräjame piyepu teeme singi wawename, lica mime singi. Mine lipu ireclota cabu ninajininige, peei ireclota lui Acejiyame täapume, cuta piyepu mine liba budre jääpänusi, peei budre

lui teeme täapume, peei name pi ireclota cabu coo budre cabu mine Yageyame täapu memi. ⁹Keriso budre itu äbituji piiyepu budre cabu ca arpinantuji Yageyame me äbitame iyeta teeme ätrunga binamewale täapume. Mine iyeta teeme ime cabu temi: lui cina ireclota cama page, cuta piiyepu teepi lui cina budre ituge äbita. ¹⁰Yoo, peei name pi weene ngeno memi singi weeme ätrunga binamewale bine aitneja? Cuta weene ngeno memi singi teebibine jajime egä, “Weene camu gemi cime pana babo umle cama äbitame?” Pepu iicana lui weeme kaakesea lica gyene. Mine iyeta cirege aclajuta Acejiyame me opo gaabe je tabe te mibibine atraname. ¹¹Yageyame te Oogäräneji Mene cabu jicenige egä,

“Ai ingle naace gyene cane toraca ireclota cama gäne, cäme mene cuta toraca gyene egä:

Iyeta biname kokorare ca cire yäapednemepesi cäme opo gaabe je.

Iyeta biname cuta cire jicemepesi egä, ‘Peese nyene Acejiyame!’ ”

¹²Yoo siige, mine yepäyepä mime ireclota cirege aitneja Acejiyame täapume.

Mime Poto Binamewale bime Ätrunga Gone Sabe Wawena

¹³Yoo, peei name pi mine gone mimemime aitneja. Mine pätä kirece ngene atwanena pa yaacatesi egä, “Mine gone epu mule wawena lui te nuuja ätrunga biname ne jaawenuge atramame coo niiya mule wawename.” ¹⁴Yoo, Yageyame Yeesu cabu ca cane toraca umle gäne egä nuuja deedei coo cibi gwidape lica gyene cude, yepä biname te liba gwidape poto cidi me ngene jwaatwa-nanuge egä, “Ai lui cude gyene,” siige piba teeme täapume cude me läbituge. ¹⁵Weene liba weeme poto binamewale bine weeme cibi ärngäja ca ngenecu mäpu me jaawenemuye, weene piba owecu lica gemi teeme täapume. Keriso cuta peei biname bime täapume budre ituge äbita; gone teeme Yeesu bau ätrunga ne sabe wawena weeme deedei äbita mule ca. ¹⁶Ngänu gyene weene umle egä weeme mule conocäco gyene, yepä weene gone mara mule biname bime sobe cabu peei ne wawena! Teepi piba weebibine lica birige aitneja weeme mule täapume. ¹⁷Yoo, Acejiyame me waadena lui lica ärwäja piiyepu änäja cotre poto cidi me, ingle peei lui matimati gwidape gemi. Yepä, teeme waadena lui conocäco mule poto cidi me, piiyepu poode nuuja biname cama, piiyepu ngenecu gege poto cidi me. Aceji Seemo te mibibine nitityärinuge ai bine wawenecame. ¹⁸Weene liba Keriso täapume pepu inajininuge, piba Acejiyame ngenecu miiji gyene weeme täapume, piiyepu biname cina ngenecu miiji gemi.

¹⁹Yoo, peei name pi mine miiji apicetnera peei mule taatu wawenecame lui cina mibibine poode cabu me niwadininusi piiyepu lui cina mimemime kokre me niweninininusi. ²⁰Yoo, Acejiyame me kaakesea nuuja ätrunga biname cabu gone sabe jaawenemuye weeme cibi ärngäja

mule ca. Iyeta deedei piyepu cibi miiji gemi ärwäjame, yepä conocono gyene cibi coo deedei äbita, liba peei mule te nuuja biname ne jaawenuge niyya mule wawename. ²¹ Miiji mule agesa: Gone cibi ärngäja coo waina niyye änäja, coo nuuja gwidape ne wawena, liba peei te weeme ätrunga biname ne atrama me jaawenusi. ²² Yoo, miiji gyene liba Acejiyame taatu umle gyene weeme ätrunga peei mule poto cidi me. Yoo, biname te liba apu ngene jwaatwananuge egä, “Cane lui mule ne jewenenine, peei miiji gyene cäme täöpume,” piyepu tabe liba lica niyya lasicnantuge peei poto cidi me, tabe piba miiji taatu yaanajuge. ²³ Yepä, tabe liba neeneni ngene atwanena cama jicuge egä, “Baa, cane yäärwäjene, coo lica?” tabe piba conocono mule ne jaawenuge liba yäärwäjuge, ingle tabe ätrunga cabu ca lica jaawenuge. Yoo, iyeta mule lui lica ätrunga cabu ca wawenäjeji, peei lui conocono mule gemi.

**Mine Miiji Cängena Ngene Atwanena cuta Nuuja
Biname bime täöpume; Lica Mime Taatu**

15 ¹ Mine lui bime ätrunga kokre gyene Yeesu cabu, mine miiji cängena gigri lenaja ngenecu onyaonya biname cama, teepi liba ngenecu maramara läbitininusi Acejiyame me singi mule poto cidi me. Mine gone mime miiji taatu täöpume lenaja, ² yepä mine miiji mime nuuja binamewale poto cidi me cuta ngene atwanena teeme miiji täöpume teeme ätrunga ne kokre ceerame. ³ Keriso cuta piyepu, tabe teeme miiji täöpume lica enajuji, pätä Oogäräneji Mene te jicenige egä, “Biname lui cina niyya mene jicemusi mäáme poto cidi me, teeme peei niyya mule te cuta cebine niyya nawenuge.” ⁴ Yoo, iyeta Acejiyame me Oogäräneji Mene lui mime ätityera täöpume. Peei te mibibine nibiberäjininige kokre ngene atwanena cama lenajame piyepu cängena awagriyame Acejiyame me ätityera padare ne. ⁵ Mime kokre piyepu mime ätityera tädenige Acejiyame cabu ca. Cane Acejiyame ne ewejanenine tabe weebibine yepä ngene atwanena ceerame Yeesu Keriso me ngene atwanena liyepu, ⁶ naace täöpume weeme yepä ngene atwanena cama piyepu yepä mene ca Acejiyame ne awepyeräjame, lui gyene mime Yageyame Yeesu Keriso me Babe piyepu teeme Acejiyame.

**Acejiyame me Miiji Mene Lui Iyeta Gawe
Maramara Biname bime täöpume**

⁷ Yoo, peei name pi weeme ätrunga binamewale bine toraca biname me jaawenemuye owecu cama, epu pana Keriso weebibine lipu teeme biname me ituge wawena. Nuuja biname cina peei mule ne liba pa jääpänepesi, teepi Acejiyame ne pa yaawepyeräjepesi. ⁸ Yoo, Yeesu Keriso täduji Israela biname bine ätityerame biname bine awabame egä Acejiyame teeme mene toraca me jaawenuge, tabe lui mene itu jejemuji Israela biname

bime kaakesaare bine egä tabe teeme ätityera biname ne pa täätyepipi.

⁹Tabe cuta piiyepu täduji nuuja gawe biname bine ätityerame teepi piba Acejiyame ne awepyeräjame teeme owecu täápume. Pisi nyene Oogäräneji Mene cabu Daawida te lui mene Acejiyame ne jejuji egä,

“Cane meebine eso näcärenine nuuja gawe biname cama teeme sobe cabu.

Cane mäáme ngii uupera ca naawepäntenine.”

¹⁰Oogäräneji Mene te nuuja poto cabu jiicenige egä,

“Gawe maramara biname, weene babo gege äbitineye Acejiyame me jäjäcräneji biname cama.”

¹¹Cuta nuuja mene te egä,

“Gawe maramara biname, weene iyeta Acejiyame ne ewepyeräjeye.

Yoo, iyeta ai gawecewe biname, weene teebine eso ecäreye!”

¹²Cuta Isaya nuuja Oogäräneji Mene cabu jiicuji egä,

“Ingwe ca yepä biname cire tädepi Yese^a me ingle cabu ca.

Acejiyame teebine cire yaacitepi nuuja gawe biname bine waadename.

Teepi ätrunga cire yaacitepesi teeme cabu.”

¹³Yoo siige, Acejiyame lui cabu mine ngene atwanena bine yaacranemusi, cane teebine ewejanenine tabe weebibine baborage gege piiyepu poode ceerame weene liba teebine jitrungeniye, weene piba baborage ätrunga cama jewagrieniye teeme ätityera täápume. Aceji Seemo teeme kokre ca pepu ngene atwanena pa icäripi.

Paulo Rooma Biname bine Jejemige Ai Leta Ngena Tääpu Myene

¹⁴Cäme ätrunga binamewale, cane cäme ca umle gäne egä weene miiji mule biname gemi, piiyepu weene umle cama gemi lui mule bine wawenecame, cuta piiyepu weene miiji gemi nuuja biname bine bäärmi mene jajanename. ¹⁵Yepä, cane weeme bau conocäorage yoogärenine weene poto gwidape bine ngene apecna-me. Cane conocäore jijaneninine weebibine, ingle naace gyene Acejiyame te cebine ai miijirage kaakesea itu näcäruji ¹⁶Yeesu Keriso me ätyepäneji biname me äbitame gawe maramara biname bine ätityerame. Cane epu pana gäne Acejiyame me iiwäreja biname liiyepu. Cane teeme Miiji Mene gawe maramara biname bine jaajananemune teepi te owecu gwidape pana äbitame Acejiyame täápume, lui poto cidi me tabe ngenecu miiji me pa läbitepi, Aceji Seemo liba teebibine teeme täápume mara me jaawenemuge. ¹⁷Yoo, cane gege gäne, ingle cane baborage kaakesea Acejiyame täápume ituge wawena Keriso Yeesu cama. ¹⁸Cane weebibine jijenininine egä lica cäme kokre name pi cäme kaakesea baborage gyene,

^a 15:12 Yese: Yese lui Daawida me babe ge, piiyepu Daawida lui Yeesu me kaakesaare ge.

yepä Keriso babo kokre cebine itu näcärepi gawe maramara biname bine waadename teepi Acejiyame tääpume ätrungame teeme gaabe cabu otnime. Peei te itu läbitepi căme mene piyepu căme kaakesea cabu ca, ¹⁹kokre owowä piyepu ciitaca mule cabu ca, piyepu Aceji Seemo me kokre cabu ca. Yoo, Yerusalema cewe cabu ca ngálu Iluriku gawe ne oomlaname, cane iyeta pui gawe cabu itu totnäjumene biname bine iyeta poto ta jajanename Mijji Mene Keriso poto cidi me. ²⁰Niinăce cabu ca căme singi puga ge Mijji Mene jajanename cewe maramara biname bine, lui cina lica ituge ätecija Keriso poto cidi me. Căme singi lui pui maramara cewe cabu puma kaakesea agedname, cuta lica otni nuuja biname te luma Acejiyame me mene itu jaajanemepi. ²¹Oogărăneji Mene te ai poto cidi me jicenige egă,

“Lui biname bime bau lica ituge jajanena teeme poto cidi me, teepi Mijji Mene ca pa jăăpănepesi teebine, piyepu lui biname cina lica ituge ätecija, teepi umle pa läbitipesi.”

Paulo Rooma Biname bine Jejemige Teeme Singi Teebibine Ädărane

²²Yoo, bucurage padare cane liba singi ge otni weeme bau me, căme nuuja cewe cabu kaakesea name pi, cane pui padare äblicăco weeme bau me otni. ²³Yepă, ai padare peei maramara cewe cabu lui kaakesea ne cane bepirine. Yoo, bucurage kămăge cama căme singi puga ge weebibine ädărane, ²⁴cuta piyepu ai padare cabu cane otni măne. Cane Spaniya gawe cabu me ädenine. Cane singi găne weebibine gaabe je păpăname, piyepu weeme bau ca ätityera păpăname căme otni tääpume piyeme. Yepă, niinăce cane singi găne matikolă mijjirage padare cuta weene cama lenajame. ²⁵Yepă căro, cane niinăce ädenine Yerusalema me Acejiyame me biname bine puma ätityerame, ²⁶ingle naace gyene maramara ätrunga ingle Makedoniya piyepu Akaya gawe cabu teepi ngenecu gege cama mene itu jaatranepesi rarekaake otoname piyepu ätyepame owecumete biname bime bau me, lui piti nemi Yerusalema ätrunga biname bime ingle cabu. ²⁷Teepi teeme singi cabu peei ne itu jaatranepesi, piyepu teepi mijji pepu wawename, ingle Israela biname cabu ca nuuja gawe biname cina ituge păpăna Acejiyame me mijji teeme seemo bime tääpume. Teepi peei name pi mijji cuta Israela biname bine ätityerame mijjimiji gwidape ca teeme tääpe tääpume. ²⁸Yoo, cane liba peei kaakesea ne pa yaapirepene piyepu iyeta otona rarekaake căngena teebibine pa yăăcăremepene, cane piba pa labyemărepene Spaniya gawe me otnime piyepu weebibine gaabe cabu ädărane. ²⁹Piyepu cane umle găne egă cane liba pa tädepene, cane weeme bau me pa tatyaramtepene iyeta Keriso me mijji cama.

³⁰Căme binamewale, mime Yageyame Yeesu Keriso name pi piyepu mime singi name pi, Aceji Seemo te lui mibibine itu nicăripi, cane

weebibine jijenininine Acejiyame ne cane cama awejename căme miiji t  pume. ³¹Teebine ewejaneye eg  pui Israela biname Yuudea gawe cabu lui cina lica Yeesu Keriso t  pume birige  trunga, teepi lica cebine niia me wawena. Acejiyame ne cuta ewejaneye eg  teeme biname Yerusalemame cewe cabu je, teepi ngenecu miiji cama pa yaawadepesi pui rarekaake bine lui cime  tityera gyene teeme t  pume. ³²Acejiyame liba singi gyene, cane piba babo gege cama pa t depene weeme bau me mime ngenecu apretnemalame. ³³Yoo, Acejiyame lui te mibibine ngenecu poode nic rininuge, cane teebine ewejanenine iyeta weeme gome lenajame. Pepu pa l bitege.

Paulo Sebore Jewenemige Poto Rooma  trunga Biname bine

16 ¹Mime yep   trunga biname ngii Poebe tabe pa twaaclepi Rooma me. Tabe miijirage magebi gwene, lui te c ngenarage kaakesea jaawenemuge Kenekrea  trunga ingle cabu je. ²Weene teebine sebore jowenepeye, piba c ngena tocanepeye weeme  tru-nga ingle cabu me. Mine Acejiyame me binamewale miiji mime yep  ne pepu ire jaatwusi. Teeme singi gwidape t  pume weene utity reya, ingle tabe bucurage biname bine ituge  tityera, cebine piyepu.

³Sebore Akwila piyepu teeme coga Prisila t  pume. Teepi cane cama gigri kaakesea jaawen si Yeesu Keriso t  pume. ⁴Teepi mameta budre j  p n si cebine  tityera name pi. Cane singi teebibine baborage eso ceerame, lica cane taatu, yep   trunga biname iyeta gawe maramara biname bime ingle cabu teepi cuta piyepu. ⁵Cuta sebore pui  trunga ingle biname bime t  pume, lui cina teeme mete cabu labasecretininusi irecu  tumutame.

Sebore c me singi biname Epaenetus t  pume. Tabe niin ce biname gyene Asiya Probins cabu lui te Keriso ne itu jitrunguji. ⁶Sebore cuta Mariya t  pume, tabe lui baborage kaakesea ituge wawena weeme t  pume. ⁷Sebore cuta Andronikus naabi Juniya t  pume. Teepi c me Israela biname gegi, lui cina krokeciya mete cabu cane cama itu aanajuji mime  trunga mule name pi. Teepi baborage  tyep neji biname gegi, lui cina  trunga biname me ituge  bita c me niin ce gaabe me.

⁸Sebore Ampliyatus t  pume. Tabe c me singirage biname gyene mime Yageyame t  pume. ⁹Sebore Urbanus t  pume, tabe lui mine cama kaakesea biname gyene Keriso t  pume. Piyepu sebore c me ngenecurage biname Stakus t  pume. ¹⁰Sebore Apeles t  pume, lui te Keriso ne  trunga me apicetnera cabu ca tasatuji kokre cama. Sebore iyeta biname t  pume lui cina Aristobulus me mete cabu yaacrajuge. ¹¹Sebore Herodiyo t  pume. Tabe cuta c me Israela biname gyene. Cuta sebore  trunga biname bime t  pume lui cina Narkisus me mete cabu yaacrajuge.

¹²Sebore Trupaena naabi Truposa bime täápume. Ai neeneni magebi cina mime Yageyame me kaakesea cängena jaawenäsi. Cuta sebore căme ngenecurage biname Perisis täápume. Tabe miijirage magebi gwene, lui baborage kaakesea ituge wawena mime Yageyame täápume. ¹³Sebore Rupus täápume. Tabe mime Yageyame me babo miijirage kaakeseyame gyene. Cuta sebore teeme mage täápume, lui te căme mage pana cebine itu ire natwepi. ¹⁴Sebore Asunkritus, Plego, Hermes, Patrobas, piiyepu Hermas täápume, piiyepu iyeta ätrunga biname lui teeme ingle cabu temi. ¹⁵Sebore Pilologus naabi Juliya; Nereus piiyepu teeme ngule; cuta Olimpas piiyepu iyeta Acejiyame me biname lui teeme ätrunga ingle cabu temi.

¹⁶Weene weemeweme ajecletnäjäineye gege cama. Keriso me biname cina iyeta maramara ätrunga ingle cabu ca, teepi weeme täápume sebore mene ne jityepenisi.

Paulo Leta ne Umle Mene ca Ermuji

¹⁷Căme binamewale, cane weebibine toraca jijenininine, cängena ire pui biname täápume lui cina biname bine maramara me jaawenemusi. Teepi biname bine mara walya gaabe yăăcăremusi Acejiyame poto cidi me, siige poto biname bime ätrunga sabe jaawenemusi. Yepă, weebibine pepu lica ituge abiberăja; weene ten cama abasuta gone! ¹⁸Biname lui cina pepu yaabiberăjemusi, teepi lica mime Yageyame Keriso täápume kaakesea jaawenemusi, yepă teeme kaakesea lui teeme singisingi mule täápume. Poto ngenecu onyaonya biname bine teepi yaangletnăjemusi teeme mitemite mene ca. ¹⁹Yoo, iyeta biname cina cebine najanusi egă Miiji Mene te kokre cama yaanajuge weene Rooma ätrunga biname cama. Cane peei name pi mati gege lica găne weeme poto cidi me. Cane singi găne weene umle cama lenajame miiji mule poto cidi me, yepă umle căco pana lenajame niiya mule täápume. ²⁰Piba Acejiyame lui te mibibine poode nicărininuge, tabe Satani me kokre ne pa yaapremalepi teebine gawe me wawename weeme täápume. Mime Yageyame Yeesu me miiji te weene cama yaanajeje.

²¹Timoti lui te cane cama kaakesea jaawenemuge, tabe jiičenige sebore weeme täápume. Căme Israela binamewale Lukiyus, Yasona, piiyepu Sosipata teepi cuta sebore jiwenininisi.

²²Yoo, cane săne Tertiyus cuta piiyepu weebibine sebore jiweninine mime Yageyame me ngii cabu. Paulo lui mene jiičenige, cane te yoogărenine weeme täápume.

²³Gayus lui me mete cabu cime ätrunga ingle biname cina labasecretinago, tabe cuta sebore weebibine jiwenininige, cuta piiyepu Eratus, lui te rarekaake ire jaatwemuge ai babo cewe täápume, cuta piiyepu mime biname Kwartas, teepi weebibine sebore jiwenininisi.

[²⁴Mime Yageyame Yeesu Keriso me babo miiji te iyeta weene cama yaanajege.]

Paulo te Acejiyame ne Ewepyeräjige

²⁵Mine miiji Acejiyame ne awepyeräja. Teeme kokre pisi nyene mibibine ätityerame mine ätrunga cabu cängena lenajame. Teeme kokre tädenige pui Miiji Mene cabu ca, cane lui jiicemune Yeesu Keriso poto cidi me. Peei Miiji Mene te Acejiyame me singi ne jaawabudnituge, lui singi poto cidi me biname cina umle cäco yaacrajuge teeme niinäce kaakesaare cabu ca. ²⁶Yepä, ai padare cabu Acejiyame me singi awabudnitäneji gyene. Teeme mename biname cina teeme singi itu jiicemujisi Acejiyame me Oogäräneji Mene cabu. Acejiyame lui iyeteta gyene, tabe ätrunga biname bine ituge jaji teepi iyeta gawecewe biname bine jajanenname egä: Acejiyame singi iyeta biname bine waadename. Tabe singi iyeta biname cina teeme mene acatame teebine ätrungame.

²⁷Yoo, Acejiyame taatu umle cama gyene iyeta gwidape poto cidi me. Jamyacu apacyera lui teeme yene iyeteta Yeesu Keriso me kaakesea cabu ca. Pepu pa yaanajege!

Cane ngii Paulo, siige cäme mene ngälu peese.